



# SLUŽBENE NOVINE TUZLANSKOG KANTONA

GODINA 22 • TUZLA, SRJEDA, 07. OKTOBAR 2015. GODINE • IZDANJE NA BOSANSKOM JEZIKU • BROJ 11

591

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj 29.9.2015. godine, d o n o s i

## ZAKON O TURISTIČKIM ZAJEDNICAMA

### I. OSNOVNE ODREDBE

#### Član 1.

##### (Predmet zakona)

Ovim zakonom uređuje se osnivanje, organizacija i rad turističkih zajednica, način njihovog finansiranja i poslovanja, kao i kriteriji za kategorisanje turističkih mjesta.

#### Član 2.

##### (Ciljevi osnivanja)

(1) Turističke zajednice se osnivaju radi razvoja, unapređenja i promocije turizma na području lokalnih zajednica kao i Tuzlanskog kantona (u daljem tekstu: Kanton) u cjelini, i privrednih interesa pravnih i fizičkih lica koja pružaju ugostiteljske i druge turističke usluge ili obavljaju drugu djelatnost neposredno povezanu s turizmom, na način da upravljaju destinacijom na nivou za koji su osnovane.

(2) Ciljevi osnivanja turističkih zajednica su:

a) unapređenje općih uslova boravka turista kroz formiranje cjelovite turističke ponude, podizanje kvaliteta turističkih i drugih komplementarnih usluga, očuvanje i stvaranje prepoznatljivog i privlačnog turističkog ambijenta područja za koje su osnovane;

b) razvijanje svijesti o važnosti turizma, kao i privrednim, društvenim i drugim efektima turizma, o potrebi i važnosti očuvanja i unapređenja svih elemenata turističkog proizvoda određenog područja, a posebno zaštite životne sredine;

c) podsticanje razvoja turističke infrastrukture i pružanja informacija turistima;

d) promocija turističkog proizvoda područja za koje su osnovane.

#### Član 3.

##### (Djelatnost turističkih zajednica)

(1) Djelatnost turističkih zajednica se zasniva na načelu ostvarivanja javnog interesa u oblasti turizma, čiji osnovni cilj nije ostvarivanje neposredne dobiti.

(2) Izuzetno od stava (1) ovog člana, turističke zajednice mogu da:

a) upravljaju dobrima i resursima koji su im dati na upravljanje odlukom osnivača u skladu sa posebnim propisima (izletišta, lovišta, parkovi, plaže, jezera, rijeke, prirodno i kulturno-historijsko naslijeđe),

b) organizuju manifestacije i priredbe,

c) objavljuju turističke komercijalne oglase u oglasnim medijima koji su im dati na upravljanje odlukom osnivača,

d) prodaju suvenire, ulaznice, turističke karte i brošure, osim sopstvenog promotivnog materijala,

e) obavljaju i druge poslove od javnog interesa koji su u funkciji razvoja turizma i koji nisu u suprotnosti sa ovim zakonom i drugim propisima.

#### Član 4.

##### (Pravni status)

(1) Turističke zajednice imaju svojstvo pravnog lica.

(2) Svojstvo pravnog lica turistička zajednica stiče danom upisa u Upisnik turističkih zajednica (u daljem tekstu: Upisnik), a gubi brisanjem iz Upisnika.

(3) Zahtjev za upis u Upisnik, turistička zajednica dužna je podnijeti u roku od 15 dana od dana održavanja osnivačke skupštine.

(4) Zahtjev za upis promjene podataka upisanih u Upisnik, turistička zajednica dužna je podnijeti u roku od 15 dana od dana nastale promjene.

(5) Upisnik vodi Ministarstvo trgovine, turizma i saobraćaja Tuzlanskog kantona (u daljem tekstu: Ministarstvo).

(6) Ministar trgovine, turizma i saobraćaja Tuzlanskog kantona (u daljnjem tekstu: ministar) će posebnim pravilnikom propisati oblik i sadržaj obrasca zahtjeva za upis u Upisnik, dokumentaciju neophodnu za upis, način upisa, te sadržaj i način vođenja Upisnika.

(7) O upisu turističke zajednice u Upisnik, upisu promjene upisanih podataka i brisanju turističke zajednice iz Upisnika Ministarstvo donosi rješenje.

(8) Protiv rješenja iz stava (7) ovog člana žalba nije dopuštena, ali se može pokrenuti upravni spor.

#### Član 5.

##### (Sistem turističkih zajednica)

Turistička zajednica se može osnovati kao:

a) turistička zajednica općine/grada,

b) turistička zajednica područja,

c) Turistička zajednica Tuzlanskog kantona (u daljem tekstu: Turistička zajednica Kantona).

**Član 6.****(Članovi turističke zajednice)**

- (1) Turistička zajednica ima obavezne članove.
- (2) Osim članova iz stava (1) ovoga člana, turistička zajednica općine/grada, odnosno područja može imati i dobrovoljne članove.
- (3) Skupština turističke zajednice, na prijedlog turističkog vijeća, može lica, posebno zaslužna za razvoj i promociju turizma, imenovati počasnim članovima turističke zajednice.
- (4) Počasni članovi turističke zajednice ne mogu birati niti biti birani u organe turističke zajednice.

**Član 7.****(Javnost rada)**

- (1) Rad turističkih zajednica je javan.
- (2) Javnost rada osigurava se i ostvaruje na način propisan statutom turističke zajednice.

**Član 8.****(Statut turističke zajednice)**

- (1) Prava i obaveze turističkih zajednica utvrđuju se ovim zakonom i statutom turističke zajednice.
- (2) Statut turističke zajednice sadrži odredbe o:
  - a) nazivu i sjedištu turističke zajednice,
  - b) zadacima turističke zajednice,
  - c) pravima, obavezama i odgovornosti članova turističke zajednice,
  - d) načinu predstavljanja i zastupanja turističke zajednice,
  - e) djelokrugu, ustrojstvu, načinu izbora i opoziva, mandatu te odgovornosti članova organa turističke zajednice,
  - f) načinu odlučivanja u turističkoj zajednici i organima turističke zajednice,
  - g) načinu ostvarivanja javnosti rada,
  - h) načinu donošenja statuta i drugih općih akata,
  - i) imovini, načinu sticanja imovine i raspolaganju imovinom,
  - j) postupku s imovinom u slučaju prestanka turističke zajednice,
  - k) drugim pitanjima od značaja za djelovanje turističke zajednice.

(3) Turistička zajednica donosi statut i odluku o izmjenama i dopunama statuta uz prethodnu saglasnost nadležne općinske/gradske službe, odnosno Ministarstva.

(4) Ako turistička zajednica ne donese statut, odnosno odluku o izmjenama i dopunama statuta u roku od mjesec dana od dana prijema saglasnosti iz stava (3) ovog člana, smatrat će se da saglasnost nije data.

(5) Statuti turističkih zajednica općine/grada i područja i njihove izmjene i dopune objavljuju se u službenom glasilu općine/grada, a statut Turističke zajednice Kantona u „Službenim novinama Tuzlanskog kantona“.

(6) Službena glasila općina/gradova iz stava (5) ovog člana, turističke zajednice su dužne dostaviti Ministarstvu u roku od 15 dana od dana objave statuta, odnosno izmjene i dopune statuta u službenom glasilu.

**Član 9.****(Organi turističke zajednice)**

- (1) Organi turističke zajednice su:
  - a) skupština,
  - b) nadzorni odbor,
  - c) turističko vijeće.
- (2) Statutom turističke zajednice može se predvidjeti osnivanje i drugih organa.
- (3) Članovi organa odgovorni su za zakonito i savjesno obavljanje svojih dužnosti.

(4) Mandat članova organa turističke zajednice traje četiri godine, a članovi mogu biti ponovno birani, odnosno imenovani najviše još jedan mandat.

(5) U slučaju prestanka mandata člana organa prije isteka vremena na koje je izabran, novi član se bira ili delegira na vrijeme do isteka mandata na koji je izabran prethodnik.

**Član 10.****(Skupština)**

- (1) Skupština turističke zajednice je najviši organ upravljanja u turističkoj zajednici.
- (2) Skupštinu turističke zajednice čine članovi, odnosno predstavnici članova turističke zajednice.
- (3) Skupština turističke zajednice:
  - a) donosi statut turističke zajednice,
  - b) donosi poslovnik o radu skupštine,
  - c) bira i razrješava predsjedavajućeg skupštine turističke zajednice iz reda članova skupštine,
  - d) bira i razrješava članove nadzornog odbora turističke zajednice, koje prema odredbama ovog zakona bira skupština,
  - e) odlučuje o izboru i razrješenju članova turističkog vijeća, koje prema odredbama ovog zakona bira skupština,
  - f) donosi godišnji program rada i godišnji finansijski plan turističke zajednice,
  - g) usvaja godišnji izvještaj o radu i finansijski izvještaj turističke zajednice,
  - h) donosi odluku o osnivanju i ustroju turističkog ureda,
  - i) donosi odluku o izvještajima koje podnose turističko vijeće i predsjednik turističkog vijeća,
  - j) donosi odluke i rješava druga pitanja kada je to predviđeno propisima i statutom turističke zajednice.
- (4) Predsjedavajući skupštine turističke zajednice saziva i predsjedava sjednicama skupštine turističke zajednice i za svoj rad odgovara skupštini turističke zajednice.
- (5) Skupština turističke zajednice održava se najmanje dva puta godišnje.

**Član 11.****(Nadzorni odbor)**

- (1) Nadzorni odbor nadzire:
  - a) vođenje poslova turističke zajednice,
  - b) materijalno i finansijsko poslovanje i raspolaganje sredstvima turističke zajednice,
  - c) izvršenje i provedbu programa rada i finansijskog plana turističke zajednice.
- (2) O obavljenom nadzoru, nadzorni odbor podnosi pisani izvještaj turističkom vijeću i skupštini turističke zajednice.
- (3) Nadzorni odbor provodi nadzor iz stava (1) ovog člana svaka tri mjeseca, odnosno četiri puta godišnje.

**Član 12.****(Članovi nadzornog odbora)**

- (1) Nadzorni odbor turističke zajednice ima najmanje tri člana, a čine ga:
  - a) članovi koje bira skupština turističke zajednice,
  - b) član kojeg delegira osnivač.
- (2) Statutom se može odrediti veći broj članova nadzornog odbora s tim da njihov broj mora biti neparan.
- (3) Član nadzornog odbora ne može biti član turističkog vijeća niti skupštine turističke zajednice.
- (4) Nadzorni odbor iz redova svojih članova bira predsjednika i zamjenika.
- (5) Nadzorni odbor donosi poslovnik o svom radu.



**Član 13.****(Turističko vijeće)**

(1) Turističko vijeće je izvršni organ skupštine turističke zajednice.

(2) Turističko vijeće obavlja poslove utvrđene ovim zakonom i statutom turističke zajednice i za svoj rad odgovorno je skupštini turističke zajednice.

(3) Turističko vijeće turističke zajednice:

a) provodi odluke i zaključke skupštine turističke zajednice,

b) predlaže skupštini godišnji program rada i finansijski plan turističke zajednice, te godišnji finansijski izvještaj,

c) podnosi skupštini izvještaj o svom radu najmanje dva puta godišnje,

d) upravlja imovinom turističke zajednice u skladu sa ovim zakonom i statutom te u skladu sa programom rada i finansijskim planom,

e) donosi opće akte za stručnu službu turističke zajednice,

f) imenuje i razrješava voditelja turističkog ureda,

g) utvrđuje granice ovlasti za zastupanje turističke zajednice i raspolaganje finansijskim sredstvima turističke zajednice,

h) donosi poslovnik o radu,

i) obavlja i druge poslove utvrđene ovim zakonom i statutom turističke zajednice.

(4) Turističko vijeće ima predsjednika turističkog vijeća koji predstavlja turističku zajednicu.

(5) Dužnost predsjednika turističkog vijeća turističke zajednice općine/grada obavlja općinski načelnik/gradonačelnik ili lice koje imenuje načelnik/gradonačelnik.

(6) Dužnost predsjednika turističkog vijeća turističke zajednice područja obavlja, u skladu sa odredbama statuta, jedan od općinskih načelnika/gradonačelnika ili lice koje zajednički imenuju načelnici/gradonačelnici.

(7) Dužnost predsjednika turističkog vijeća Turističke zajednice Kantona obavlja ministar ili lice koje imenuje ministar.

(8) Predsjednik turističkog vijeća turističke zajednice saziva i predsjedava sjednicama turističkog vijeća i za svoj rad odgovara skupštini turističke zajednice i osnivaču.

(9) Turističko vijeće može pravovaljano odlučivati ukoliko sjednici prisustvuje više od polovice članova vijeća, a odlučuje većinom glasova prisutnih članova.

**Član 14.****(Turistički ured)**

(1) Skupština turističke zajednice može, shodno potrebi, osnovati turistički ured turističke zajednice.

(2) U turističkom uredu obavljaju se stručni i administrativni poslovi vezani za potrebe turističke zajednice.

(3) Turističko vijeće pravilnikom propisuje posebne uslove u pogledu stručne spreme, radnog iskustva, znanja jezika i drugih posebnih znanja i sposobnosti, koje moraju ispunjavati zaposleni u turističkom uredu.

(4) Na radne odnose zaposlenih u turističkom uredu primjenjuju se opći propisi o radu, ako ovim zakonom nije drugačije propisano.

(5) Do donošenja odluke iz stava (1) ovog člana stručne i administrativne poslove vezane za potrebe turističke zajednice obavlja nadležna općinska/gradska služba za turističku zajednicu općine/grada, odnosno Ministarstvo za Turističku zajednicu Kantona.

**Član 15.****(Voditelj turističkog ureda)**

(1) Turistički ured ima voditelja koji se imenuje na četiri godine na osnovu javnog konkursa i može biti ponovo imenovan, ali ne više od dva mandata.

(2) Voditelj turističkog ureda zastupa turističku zajednicu, organizuje i rukovodi radom i poslovanjem turističkog ureda, provodi odluke turističkog vijeća turističke zajednice i u granicama utvrđenih ovlasti odgovoran je za poslovanje turističke zajednice i zakonitost rada turističkog ureda.

(3) Voditelj turističkog ureda za svoj rad odgovara turističkom vijeću.

(4) Turističku zajednicu do izbora voditelja turističkog ureda zastupa predsjednik turističkog vijeća turističke zajednice.

(5) Voditelj turističkog ureda i drugi radnici zaposleni u turističkom uredu ne mogu biti predsjednici niti članovi skupštine ili turističkog vijeća niti jedne turističke zajednice.

**II. TURISTIČKA ZAJEDNICA OPĆINE/GRADA****Član 16.****(Odluka o osnivanju turističke zajednice općine/grada)**

(1) Odluku o osnivanju turističke zajednice općine/grada donosi općinsko/gradsko vijeće na osnovu prethodne saglasnosti Ministarstva.

(2) Zahtjev za davanje saglasnosti za osnivanje turističke zajednice općine/grada Ministarstvu podnosi općinski načelnik/gradonačelnik.

(3) Zahtjevu iz stava (2) ovoga člana prilaže se pismo namjere za osnivanje turističke zajednice, obim unutrašnje organizacije turističke zajednice i procjena izvornih prihoda potrebnih za rad turističke zajednice, kao i izvori osiguranja istih.

(4) Prilikom davanja saglasnosti iz stava (1) ovoga člana, Ministarstvo će posebno voditi računa o mogućnostima finansiranja predloženog obima organizacije i finansijskim mogućnostima izvršavanja osnovnih zadataka turističke zajednice.

(5) Pripreme radnje za osnivanje turističke zajednice općine/grada i sazivanje osnivačke skupštine obavlja općinski/gradski organ uprave nadležan za poslove turizma.

**Član 17.****(Obavezni članovi turističke zajednice općine/grada)**

(1) Obavezni članovi turističke zajednice općine/grada su sva pravna i fizička lica, koja na području općine/grada u kojoj se osniva turistička zajednica imaju sjedište ili bilo kakav organizacioni dio i koja ostvaruju prihod pružanjem ugostiteljskih ili drugih turističkih usluga ili obavljaju s turizmom neposredno povezane djelatnosti.

(2) Djelatnosti iz stava (1) ovog člana utvrđuje ministar pravilnikom, u skladu sa standardnom klasifikacijom djelatnosti u Bosni i Hercegovini.

(3) Obavezno članstvo u turističkoj zajednici općine/grada počinje danom osnivanja turističke zajednice ili danom početka obavljanja djelatnosti pravnog i fizičkog lica na području općine/grada na kojem je osnovana turistička zajednica.

(4) Na prestanak obaveznog članstva u turističkoj zajednici ne utiče privremena obustava djelatnosti kao ni sezonsko obavljanje djelatnosti.

(5) Obavezno članstvo u turističkoj zajednici općine/grada prestaje: prestankom rada turističke zajednice, prestankom pravnog lica ili smrću fizičkog lica te djelomičnim ili potpunim gubitkom poslovne sposobnosti fizičkog lica, prestankom poslovne jedinice, promjenom sjedišta, prestankom ostvarivanja prihoda pružanjem ugostiteljskih ili drugih turističkih usluga ili obavljanjem s turizmom neposredno povezanih djelatnosti.

(6) Obavezni članovi turističke zajednice, odnosno njihovi predstavnici, mogu birati i biti birani u organe turističke zajednice.

**Član 18.****(Dobrovoljni članovi turističke zajednice općine/grada)**

(1) Kao dobrovoljni članovi u turističku zajednicu općine/grada mogu se učlaniti pravna i fizička lica koja nisu članovi turističke zajednice u skladu sa članom 6. ovog zakona.

(2) O zahtjevu lica iz stava (1) ovog člana odlučuje skupština turističke zajednice.

(3) Dobrovoljni članovi turističke zajednice imaju sva prava kao i obavezni članovi.

**Član 19.****(Zadaci turističke zajednice općine/grada)**

(1) Osnovni zadaci turističke zajednice općine/grada su sljedeći:

a) unapređenje i promocija izvornih vrijednosti područja općine/grada za koju je osnovana;

b) stvaranje uslova za aktiviranje turističkih resursa na teritoriji općine/grada;

c) saradnja sa pravnim i fizičkim licima koja za predmet poslovanja imaju turističko-ugostiteljsku ili drugu komplementarnu djelatnost u cilju dogovaranja, utvrđivanja i sprovođenja politike razvoja turizma na teritoriji općine/ grada;

d) podsticanje, koordiniranje i organizovanje kulturnih, umjetničkih, zabavnih, privrednih, sportskih i drugih manifestacija, koje doprinose obogaćivanju turističke ponude;

e) podsticanje aktiviranja područja općine/grada koja nisu ili su nedovoljno uključena u turistički promet;

f) podsticanje i organizovanje akcija usmjerenih na zaštitu i očuvanju turističkog prostora, životne sredine i kulturnog naslijeđa;

g) realizovanje programa aktivnosti boravka studijskih grupa i novinara na teritoriji svog djelovanja;

h) pružanje servisnih usluga i informacija gostima;

i) organizovanje turističko-informativnih biroa;

j) registrovanje i praćenje turističkog prometa na teritoriji općine/grada;

k) saradnja sa organima i tijelima općine/grada u cilju donošenja i sprovođenja lokalnih mjera za poboljšanje uslova boravka turista na teritoriji općine/grada;

l) saradnja sa lokalnim udruženjima i nevladinim zajednicama iz oblasti turizma i ugostiteljstva i njima komplementarnim djelatnostima;

m) saradnja sa drugim lokalnim turističkim zajednicama u Kantonu i Bosni i Hercegovini;

n) sprovođenje anketa i drugih istraživanja u cilju utvrđivanja ocjene kvaliteta turističkog proizvoda na teritoriji općine/grada;

o) izrada izvještaja i informacija za potrebe Turističke zajednice Kantona;

p) obavljanje i drugih poslova u cilju promocije turističkog proizvoda na teritoriji općine/grada;

r) saradnja sa istim ili sličnim zajednicama van Bosne i Hercegovine;

s) obavljanje i drugih poslova propisanih ovim zakonom ili drugim propisom.

(2) Turističke zajednice općine/grada sudjeluju u provedbi programa i akcijama Turističke zajednice Kantona od zajedničkog interesa za sve subjekte u turizmu s područja Kantona.

**Član 20.****(Skupština turističke zajednice općine/grada)**

(1) Skupštinu turističke zajednice općine/grada čine fizička lica članovi turističke zajednice i predstavnici pravnih lica članova turističke zajednice.

(2) Ako, zbog brojnosti, nema mogućnosti da svaki član turističke zajednice bude predstavljen u skupštini, tada skupštinu čine predstavnici članova, tako da svaki predstavnik u skupštini predstavlja određeni broj članova iz odgovarajuće djelatnosti.

(3) Broj predstavnika članova skupštine iz stava (2) ovog člana utvrđuje se statutom turističke zajednice srazmjerno visini udjela odgovarajuće djelatnosti u prihodu turističke zajednice s tim da jedna djelatnost može imati maksimalno 35% predstavnika u skupštini.

(4) Kao udio u prihodu turističke zajednice iz stava (3) ovog člana, računaju se članarina i boravišna taksa koje su od strane fizičkih i pravnih lica iz određene djelatnosti uplaćene u korist turističke zajednice u godini koja prethodi godini u kojoj se provode izbori za skupštinu turističke zajednice.

(5) Ako tokom mandata dođe do promjene udjela u prihodima za više od 10%, broj predstavnika članova skupštine iz stava (2) iznova će se utvrditi prema stavu (3) ovog člana.

(6) Promjenu iz stava (5) ovog člana utvrđuje skupština istodobno s usvajanjem godišnjeg finansijskog izvještaja.

**Član 21.****(Nadležnosti skupštine)**

Pored nadležnosti skupštine iz člana 10. ovog zakona skupština turističke zajednice općine/grada:

a) bira predstavnike u skupštinu Turističke zajednice Kantona iz redova svojih članova,

b) donosi odluku o osnivanju turističko-informativnih biroa,

c) obavlja i druge poslove utvrđene ovim zakonom i statutom turističke zajednice.

**Član 22.****(Turističko vijeće turističke zajednice općine /grada)**

(1) Turističko vijeće turističke zajednice općine/ grada čine predsjednik, članovi koje bira skupština iz reda članova turističke zajednice, na način da se osigura srazmjerna zastupljenost članova pojedinih djelatnosti u turističkom vijeću, prema njihovom učešću u ukupnom prihodu turističke zajednice i predstavnici nadležnog organa lokalne samouprave.

(2) Broj članova turističkog vijeća turističke zajednice općine/grada utvrđuje se statutom.

**III. TURISTIČKA ZAJEDNICA PODRUČJA****Član 23.****(Osnivanje turističke zajednice područja)**

(1) Turistička zajednica područja osniva se za područje dvije i/ili više općina u kojima, u pravilu, nisu osnovane turističke zajednice općina/gradova.

(2) Pripremne radnje za osnivanje turističke zajednice područja i sazivanje osnivačke skupštine, obavljaju nadležne općinske službe i Turistička zajednica Kantona.

(3) Ako se turistička zajednica područja osniva za područje na kojem već postoji osnovana jedna ili više turističkih zajednica općina/gradova, skupštine već osnovanih turističkih zajednica općina/gradova, dužne su, po dobijenoj saglasnosti iz člana 16. ovog zakona, pokrenuti inicijativu prema općinskom/gradskom vijeću za donošenje odluke o prestanku turističke zajednice općine/ grada s danom upisa turističke zajednice područja u Upisnik turističkih zajednica.

(4) Turistička zajednica područja iz stava (2) ovog člana je pravni sljedbenik turističkih zajednica općina/ gradova koje prestaju njezinim osnivanjem.

(5) Inicijativu za osnivanje turističke zajednice



područja mogu dati općinski načelnici/gradonačelnici, općinska/gradska vijeća, već osnovane turističke zajednice općina/gradova i Turistička zajednica Kantona.

(6) Sjedište turističke zajednice područja iz stava (1) ovog zakona određuje se statutom.

(7) Na turističke zajednice područja odgovarajuće se primjenjuju odredbe ovoga zakona i drugih propisa o turističkoj zajednici općine/grada, osim ako nije drugačije propisano.

#### IV. TURISTIČKA ZAJEDNICA KANTONA

##### Član 24.

###### (Osnivanje Turističke zajednice Kantona)

Odluku o osnivanju Turističke zajednice Kantona donosi Vlada Tuzlanskog kantona (u daljem tekstu: Vlada Kantona) a pripremne radnje za osnivanje Turističke zajednice Kantona i sazivanje osnivačke skupštine obavlja Ministarstvo.

##### Član 25.

###### (Zadaci Turističke zajednice Kantona)

(1) Osnovni zadaci Turističke zajednice Kantona su sljedeći:

- a) objedinjavanje turističke ponude Kantona;
- b) upravljanje javnom turističkom infrastrukturom datom na upravljanje od strane Kantona;
- c) rad na promociji, plasmanu i podršci realizacije turističkog proizvoda, kao i pojedinih njegovih djelova, vrijednosti i usluga, koji čine integralni turistički proizvod;
- d) promocija plansko-projektne, plansko-razvojne i investicione dokumentacije iz oblasti turizma i njima komplementarnih djelatnosti;
- e) preduzimanje mjera i aktivnosti na kreiranju turističkog proizvoda i turističkog imidža Kantona, kao i radnje na formiranju marke turističkog proizvoda destinacije;
- f) rad na inoviranju turističkog proizvoda i aktiviranju novih turističkih prostora;
- g) ustrojavanje jedinstvenog turističkog informacionog sistema, sistema prijave i odjave turista i statističke obrade prema turističkim zajednicama nižeg nivoa organizovanja;
- h) saradnja u aktivnostima i poslovima vezanim za standardizaciju, kategorizaciju i klasifikaciju turističkog proizvoda, usluga i objekata;
- i) rad na istraživanju turističkog tržišta u cilju pozicioniranja turističkog proizvoda na turističkom tržištu;
- j) praćenje stanja na turističkom tržištu u cilju pravovremenog donošenja odgovarajućih odluka;
- k) na osnovu izvještaja lokalnih turističkih zajednica, prati, analizira i ocjenjuje izvršavanje njihovih planova i programa, utvrđenih zadataka i uloga, s posebnim naglaskom na svrsishodnost i urednost trošenja sredstava;
- l) usklađivanje interesa, pružanje podrške i koordiniranje načina izvršenja svih planskih i programskih zadataka svih turističkih zajednica na prostoru Kantona;
- m) preduzimanje mjera i aktivnosti za razvoj i promociju turizma u turistički nerazvijenim dijelovima Kantona;
- n) promocija turističke ponude Kantona u zemlji i inostranstvu;
- o) obavljanje informativnih poslova u vezi s turističkom ponudom;
- p) saradnja sa turističkim zajednicama u Bosni i Hercegovini, u zemaljama u okruženju, Evropi i svijetu;
- r) podsticanje, unapređivanje, promocija i zaštita izvorne vrijednosti i stvaranje uslova za njihovo korištenje u granicama održivog razvoja turizma Kantona;

s) koordinacija na poslovima razvoja turizma na lokalnom, entitetskom i državnom nivou;

t) rad na razvoju gostoprimstva, očuvanju prirodnih i kulturnih vrijednosti i unapređenju ekološke zaštite prostora na kome djeluje turistička zajednica;

u) obavljanje i drugih poslova propisanih ovim zakonom ili drugim propisom.

(2) Turistička zajednica Kantona će sudjelovati i provoditi programe i akcije drugih oblika organizovanja koji su od zajedničkog interesa za sve subjekte u turizmu, a s ciljem podizanja nivoa kvalitete turističke ponude Federacije Bosne i Hercegovine i Bosne i Hercegovine.

(3) Turistička zajednica Kantona saraduje s regionalnim turističkim organizacijama iz drugih zemalja i može biti član međunarodnih turističkih organizacija.

##### Član 26.

###### (Članovi Turističke zajednice Kantona)

(1) Obavezni članovi Turističke zajednice Kantona su turističke zajednice općina/gradova i turističke zajednice područja osnovane na području Kantona.

(2) Ako na području Kantona nisu osnovane turističke zajednice općina/ gradova i turističke zajednice područja, u pogledu obaveznih članova, odgovarajuće se primjenjuju odredbe ovog zakona koje se odnose na obavezno članstvo u turističkoj zajednici općine/grada.

##### Član 27.

###### (Skupština Turističke zajednice Kantona)

(1) Skupštinu Turističke zajednice Kantona čine predstavnici turističkih zajednica općine/grada, odnosno područja i predstavnici Ministarstva, kao i predstavnici privrednih asocijacija i društava koji se dobrovoljno učlane, na način i pod uslovima utvrđenim statutom.

(2) Broj predstavnika članova u skupštini Turističke zajednice Kantona utvrđuje se statutom, tako da je svaka turistička zajednica općine/grada, odnosno područja zastupljena najmanje s jednim predstavnikom.

(3) Veći broj predstavnika pojedinačne turističke zajednice općine/grada, odnosno područja zavisi o turističkom značenju područja za koje je osnovana, a određuje se srazmjerno udjelu turističke zajednice u prihodima Turističke zajednice Kantona na način da na svakih 20% učešća u prihodu ima još po jednog predstavnika.

(4) Udio u prihodu iz stava (3) ovog člana utvrđuje se prema prihodu u godini koja prethodi godini u kojoj se provode izbori za skupštinu Turističke zajednice Kantona.

##### Član 28.

###### (Turističko vijeće Turističke zajednice Kantona)

(1) Turističko vijeće Turističke zajednice Kantona ima predsjednika i šest članova.

(2) Pet članova turističkog vijeća bira skupština Turističke zajednice Kantona iz redova obaveznih članova turističke zajednice, vodeći računa o teritorijalnoj zastupljenosti i o zastupljenosti djelatnosti u turizmu (pružaoci ugostiteljskih usluga, putničke agencije i dr.), a jednog člana delegira Ministarstvo.

#### V. KATEGORIZACIJA TURISTIČKIH MJESTA

##### Član 29.

###### (Osnovni kriteriji za kategorizaciju turističkih mjesta)

(1) Osnovni kriteriji za kategorizaciju turističkih mjesta definisanog ovim zakonom čine općine/ gradovi, koje se shodno svom značaju za turizam razvrstavaju u kategorije turističkih mjesta.

(2) Osnovni kriteriji za kategorizaciju turističkih mjesta su:

a) trogodišnji prosjek ostvarenog broja turističkih noćenja u turističkom mjestu (broj noćenja);

b) broj noćenja iz tačke a) ovog stava po stanovniku turističkog mjesta (koeficijent intenziteta turističkog prometa);

c) ukupna vrijednost prometa u turističkoj i ugostiteljskoj djelatnosti po stanovniku mjesta (koeficijent specifičnog turističkog prometa).

(3) Shodno kriterijima iz stava (2) ovog člana turistička mjesta se razvrstavaju u kategorije A, B, C i D.

(4) Bliže kriterije, način vrednovanja kriterija za kategorizaciju turističkih mjesta i način određivanja kategorije turističkih mjesta na području Kantona propisuje ministar.

## VI. FINANSIRANJE TURISTIČKIH ZAJEDNICA

### Član 30. (Prihodi)

(1) Prihodi turističke zajednice su:

a) boravišna taksa,

b) članski doprinos,

c) prihodi od obavljanja privrednih djelatnosti iz člana 3. stava (2) ovog zakona.

(2) Osim prihoda iz stava (1) ovog člana turistička zajednica može ostvarivati prihode i iz:

a) budžeta jedinica lokalne samouprave, te kantonalnog budžeta, na osnovu posebnih programa,

b) dobrovoljnih priloga i darova,

c) imovine u vlasništvu i sl.

(3) Turistička zajednica se može, na osnovu posebne odluke turističkog vijeća, finansijski zaduživati u cilju realizacije programa rada i finansijskog plana, ali ukupna vrijednost zaduženja ne smije prelaziti 50% finansijskim planom predviđenih prihoda.

### VI.1. Boravišna taksa

#### Član 31.

##### (Obveznici plaćanja boravišne takse)

(1) Boravišna taksa je paušalni novčani iznos koji plaća lice koje izvan svog prebivališta koristi usluge smještaja u smještajnom objektu u kojem se obavlja turistička ili ugostiteljska djelatnost (u daljem tekstu: smještajni objekat).

(2) Smještajnim objektom, u smislu stava (1) ovog člana, smatra se: hotel, motel, pansion, turistički apartman, odmaralište, kamp, planinarski dom, soba za iznajmljivanje i svi drugi objekti u kojima se pružaju usluge smještaja.

(3) Boravišnu taksu pod jednakim uslovima plaćaju i strani državljani.

#### Član 32.

##### (Oslobađanja od obaveze plaćanja boravišne takse)

(1) Boravišnu taksu ne plaćaju:

a) djeca do 12 godina starosti;

b) lica sa teškim čulnim i tjelesnim smetnjama (slijepi, gluhi, distrofičari i dr.);

c) lica upućena na banjska i klimatska liječenja, odnosno specijalizovanu rehabilitaciju od nadležne ljekarske komisije;

d) lica koja obavljaju sezonske poslove sa prijavljenim boravkom u turističkom mjestu;

e) lica koja neprekidno borave u objektu za smještaj duže od 30 dana;

f) učesnici školskih ekskurzija, odnosno učenici i studenti čiji boravak organizuju škole i fakulteti u okviru

redovnih programa, održavanja sportskih i kulturnih manifestacija;

g) strani državljani koji su po međunarodnim konvencijama i sporazumima oslobođeni plaćanja taksi;

h) strani državljani koji organizovano, preko zvaničnih humanitarnih organizacija, dolaze radi pružanja humanitarne pomoći.

(2) Lica iz stava (1) ovog člana ne plaćaju boravišnu taksu ako podnesu dokaz o ispunjavanju uslova utvrđenih u istom stavu (članska karta, potvrda škole, ljekara, ljekarska uputa i dr.).

(3) Boravišnu taksu umanjenu za 50% plaćaju lica od 12 do 18 godina starosti.

#### Član 33.

##### (Visina i način naplate boravišne takse)

(1) Visinu boravišne takse, na prijedlog Ministarstva, utvrđuje Vlada Kantona najkasnije do kraja oktobra tekuće godine za narednu godinu.

(2) Naplatu boravišne takse vrši pravno i fizičko lice koje pruža usluge smještaja (u daljem tekstu: davalac usluga).

(3) Davalac usluga naplaćuje boravišnu taksu istovremeno sa naplatom usluge smještaja.

(4) Ako davalac usluga ne naplati boravišnu taksu, dužan je da na svoj teret uplati iznos nenaplaćene boravišne takse.

#### Član 34.

##### (Evidencija boravišne takse)

(1) Davalac usluga je dužan da u računu za usluge smještaja posebno iskaže iznos boravišne takse, a u slučajevima iz člana 32. stavovi (1) i (3) ovog zakona da navede osnov oslobađanja od plaćanja boravišne takse, odnosno osnov za plaćanje umanjene takse.

(2) Davalac usluga dužan je da vodi evidenciju o uplaćenju taksi u knjizi, odnosno drugoj odgovarajućoj evidenciji.

(3) Davalac usluga je dužan da nadležnoj kantonalnoj inspekciji i Ministarstvu do 15. u mjesecu za prethodni mjesec dostavi izvještaj o broju korisnika usluga smještaja i iznosu naplaćene boravišne takse.

#### Član 35.

##### (Prijava i odjava turista)

(1) Davalac usluga koji pruža usluge smještaja u smještajnim objektima iz člana 31. stav (2) ovog zakona dužan je u roku od 12 sati po dolasku prijaviti i po odlasku odjaviti nadležnoj turističkoj zajednici sva lica kojima se pruža usluga noćenja u smještajnom objektu.

(2) Oblik i sadržaj obrasca prijave boravka građana koji se koriste uslugama noćenja u smještajnim objektima, te sadržaj i način vođenja evidencije o boravku građana u smještajnim objektima propisat će ministar.

#### Član 36.

##### (Način korištenja i raspoređivanja sredstava boravišne takse)

(1) Sredstva prikupljena po osnovu boravišne takse, isključivo se koriste za razvoj i unapređenje turističke ponude jedinice lokalne samouprave i Kantona.

(2) Sredstva prikupljena po osnovu boravišne takse raspoređuju se na način da:

a) 70% sredstava pripada turističkoj zajednici općine/ grada, odnosno turističkoj zajednici područja,

b) 30% sredstava pripada Turističkoj zajednici Kantona.

(3) Sredstva od naplaćene boravišne takse davalac usluga uplaćuje u roku od pet dana po isteku mjeseca na račun Turističke zajednice Kantona.



(4) Turistička zajednica Kantona u roku od pet dana od dana uplate raspoređuje sredstva prikupljena po osnovu boravišne takse shodno odredbama iz stava (2) ovog člana.

(5) Ukoliko nije osnovana turistička zajednica na nivou općine/grada, odnosno turistička zajednica područja, sredstva prikupljena po osnovu naplate boravišne takse predstavljaju prihod Turističke zajednice Kantona.

## VI.2. Članski doprinos

### Član 37.

#### (Obveznici plaćanja)

(1) Članski doprinos turističkoj zajednici dužni su plaćati obavezni članovi turističke zajednice iz člana 17. stav (1) ovog zakona.

(2) Pravno lice, obavezni član turističke zajednice, koje se s više od 50% finansira iz općinskog/gradskog, kantonalnog, entitetskog ili državnog budžeta ne plaća članski doprinos turističkoj zajednici.

### Član 38.

#### (Visina članskog doprinosa)

(1) Visina članskog doprinosa koji plaća pravno i fizičko lice kao obavezni član turističke zajednice općine/grada ili područja, zavisi o:

- kategoriji turističkog mjesta u kojem je sjedište ili organizaciona jedinica,
- pravnom statusu obveznika (pravno ili fizičko lice),
- stopi na ukupni prihod utvrđenoj ovim zakonom.

(2) Zavisno od kategorije turističkog mjesta, obveznici plaćanja plaćaju članski doprinos po sljedećim procentima:

Kategorija turističkog mjesta	A	B	C	D
Pravno lice	0,05	0,045	0,04	0,035
Fizičko lice	0,025	0,02	0,015	0,01

### Član 39.

#### (Osnovica za obračun članskog doprinosa)

(1) Osnovica za obračun članskog doprinosa za pravna i fizička lica iz člana 37. stav (1) ovog zakona koja su obveznici plaćanja poreza na dobit jest ukupni prihod koji čine svi prihodi koje su ta lica dužna iskazati u računu dobiti i gubitaka, u skladu sa propisima o računovodstvu.

(2) Osnovica za obračun članskog doprinosa za fizička lica iz člana 37. stav (1) koja su obveznici plaćanja poreza na dohodak su ukupni primici iz knjige primitaka i izdataka u skladu sa propisima o porezu na dohodak, umanjeni za naplaćeni porez na dodatnu vrijednost.

(3) Za svaki organizacioni oblik izvan sjedišta pravnog i fizičkog lica utvrđuje se posebna osnovica i ukupni prihod za obračun članskog doprinosa.

(4) Pravnom i fizičkom licu smanjuje se osnovica za obračun članskog doprinosa za dio njegovog ukupnog prihoda ostvarenog u organizacionim jedinicama koje se nalaze izvan turističkog mjesta u kojem je sjedište pravnog i fizičkog lica.

### Član 40.

#### (Način plaćanja članskog doprinosa)

(1) Pravno lice plaća članski doprinos turističkoj zajednici općine/grada ili područja u kojoj ima registrovano sjedište.

(2) Pravno lice koje ima bilo kakvu organizacionu jedinicu izvan registrovanog sjedišta plaća dio članskog doprinosa općinama/gradovima ili područjima u kojima organizacione jedinice obavljaju djelatnost, srazmjerno učešću organizacione jedinice u ukupnom prometu pravnog

lica.

(3) Fizičko lice plaća članski doprinos prema sjedištu nadležnog organa koji je izdao odobrenje za obavljanje djelatnosti.

(4) Obveznici plaćanja članskog doprinosa dužni su do 15. u mjesecu izvršiti obračun i uplatu članskog doprinosa za prethodni mjesec na račun Turističke zajednice Kantona.

(5) Uz uplatu članskog doprinosa obveznici su dužni dostaviti obrazac obračuna iz koga je jasno vidljivo kojoj općini/gradu, odnosno području, pripada obračunati i uplaćeni članski doprinos.

(6) Izgled i sadržaj obrasca iz stava (5) ovog člana propisat će ministar.

### Član 41.

#### (Raspoređivanje članskog doprinosa)

(1) Sredstva prikupljena po osnovu članskog doprinosa raspoređuju se na način da:

- 70% sredstava pripada turističkoj zajednici općine/grada, odnosno turističkoj zajednici područja,
- 30% sredstava pripada Turističkoj zajednici Kantona.

(2) Turistička zajednica Kantona, u roku od pet dana od dana uplate, raspoređuje sredstva prikupljena po osnovu članskog doprinosa shodno odredbama iz stava (1) ovog člana.

(3) Ukoliko nije osnovana turistička zajednica na nivou općine/grada, odnosno područja, sredstva prikupljena po osnovu članskog doprinosa predstavljaju prihod Turističke zajednice Kantona.

## VI.3. Ostali prihodi

### Član 42.

#### (Ostali prihodi)

Prihodi koje ostvari turistička zajednica u skladu sa članom 30. stav (1) tačka c) i stav (2) pripadaju, u punom iznosu, turističkoj zajednici koja je ostvarila navedene prihode.

## VII. GOSPODARENJE U TURISTIČKIM ZAJEDNICAMA

### Član 43.

#### (Godišnji program rada i finansijski plan)

(1) Turistička zajednica je obavezna koristiti raspoloživa finansijska sredstva u skladu sa programom rada i finansijskim planom.

(2) Prijedlog programa rada i prijedlog finansijskog plana za narednu godinu, turističko vijeće turističke zajednice podnosi skupštini turističke zajednice do kraja novembra tekuće godine.

(3) Skupština turističke zajednice dužna je do kraja tekuće godine donijeti program rada i finansijski plan za narednu godinu.

(4) Godišnji program rada i finansijski plan turističke zajednice općina/gradova i turističke zajednice područja dužne su dostaviti Turističkoj zajednici Kantona odmah po usvajanju.

(5) Ako Turistička zajednica Kantona po dostavljenim godišnjim programima rada i finansijskim planovima utvrdi da nisu ispunjeni svi zakonom propisani zadaci, dužna je o tome obavijestiti odgovarajuću turističku zajednicu i Ministarstvo.

### Član 44.

#### (Sadržaj programa rada i finansijskog plana)

(1) Godišnji program rada i finansijski plan turističke zajednice obavezno sadrže sve pojedinačno utvrđene planirane zadatke i potrebna finansijska sredstva za njihovo izvršenje.

(2) Prijedlog programa rada i finansijskog plana iz stava (1) ovog člana, obavezno se dostavlja na razmatranje članovima skupštine turističke zajednice osam dana prije održavanja sjednice na kojoj se isti donose.

(3) Skupština Turističke zajednice Kantona donosi godišnji program rada i finansijski plan uz prethodnu saglasnost Ministarstva.

(4) Tokom godine turistička zajednica može mijenjati i dopunjavati svoj program rada i godišnji finansijski plan.

(5) Ako tokom godine dođe do odstupanja od utvrđenog programa rada i finansijskog plana, turistička zajednica je dužna donijeti izmjene, odnosno, dopune programa rada i finansijskog plana.

(6) Izmjene programa rada i finansijskog plana iz stavova (4) i (5) ovog člana obavljaju se na način i prema postupku kojim se donosi program rada i finansijski plan.

#### Član 45.

##### (Godišnji finansijski izvještaj)

(1) Skupština turističke zajednice dužna je do kraja marta tekuće godine usvojiti godišnji finansijski izvještaj za prethodnu godinu.

(2) Prijedlog godišnjeg finansijskog izvještaja za prethodnu godinu turističko vijeće podnosi skupštini turističke zajednice do kraja februara tekuće godine.

(3) Godišnji finansijski izvještaj za prethodnu godinu turističke zajednice općina/gradova i turističke zajednice područja dužne su dostaviti Turističkoj zajednici Kantona, a Turistička zajednica Kantona Ministarstvu.

(4) Godišnji finansijski izvještaj obavezno sadrži podatke o izvršenju programom rada pojedinačno utvrđenih zadataka, izdacima njihovog izvršenja, izdacima za poslovanje turističkog ureda i rad organa turističke zajednice, ostvarenju prihoda po izvorima, finansijskom rezultatu poslovanja, usporedbu finansijskog plana i njegovog ostvarenja s obrazloženjem odstupanja, analizu i ocjenu izvršenja programa, te procjenu učinka preduzetih aktivnosti na razvoj turizma, kao i nalaz ovlaštene revizorske kuće.

(5) Prijedlog godišnjeg finansijskog izvještaja mora se staviti na uvid članovima skupštine turističke zajednice osam dana prije razmatranja na skupštini turističke zajednice.

#### Član 46.

##### (Međusobna koordinacija)

Turističke zajednice dužne su, u postupku donošenja programa rada i finansijskog plana, međusobno saradivati.

### VIII. NADZOR

#### Član 47.

##### (Nadzor od strane Ministarstva)

(1) Ministarstvo obavlja nadzor nad provođenjem odredaba ovog zakona, te drugih propisa kojima se uređuje organizovanje i poslovanje turističkih zajednica na području Kantona.

(2) Ministarstvo može naložiti Turističkoj zajednici Kantona provođenje nadzora nad turističkim zajednicama općina/gradova, odnosno turističkim zajednicama područja i obavezno dostavljanje izvještaja odmah po izvršenom nadzoru.

(3) U provedbi nadzora Ministarstvo posebno nadzire:

a) zakonitost organizacije, rada i postupanja organa turističkih zajednica,

b) zakonitost akata turističkih zajednica,

c) izvršavanje zadataka turističkih zajednica i namjensko trošenje sredstava,

d) zakonitost rada i postupanja uposlenika turističkih ureda turističkih zajednica.

#### Član 48.

##### (Provedba nadzora)

(1) U provedbi nadzora Ministarstvo, odnosno Turistička zajednica Kantona, mogu zahtijevati izvještaje, podatke, materijale i druge obavijesti od turističkih zajednica.

(2) Turističke zajednice dužne su omogućiti Ministarstvu, odnosno Turističkoj zajednici Kantona provedbu nadzora, te im dostaviti ili pripremiti tačne i potpune izvještaje, podatke i druge materijale i obavijesti iz stava (1) ovog člana.

#### Član 49.

##### (Mjere za otklanjanje uočenih nepravilnosti)

Ako u provedbi nadzora Ministarstvo utvrdi da postoje nezakonitosti ili nepravilnosti, preduzet će mjere u svrhu otklanjanja uočenih nezakonitosti ili nepravilnosti, na način da:

a) naloži mjere koje se moraju preduzeti radi otklanjanja utvrđenih nezakonitosti ili nepravilnosti i odrediti za to primjeren rok,

b) naloži pokretanje postupka za utvrđivanje odgovornosti voditelja i odgovornog uposlenika turističkog ureda turističke zajednice,

c) preduzme i druge propisane mjere.

#### Član 50.

##### (Raspuštanje skupštine Turističke zajednice Kantona)

(1) Vlada Kantona može donijeti odluku o raspuštanju skupštine Turističke zajednice Kantona:

a) ako donosi opće akte suprotno zakonu, statutu ili drugom propisu, ili zbog povreda zakona i drugih propisa,

b) ako ne izabere članove turističkog vijeća u roku od 60 dana od dana konstituisanja, isteka njihovog mandata ili njihova razrješenja, odnosno od dana podnošenja ostavke,

c) ako ne donese godišnji program rada i finansijski plan, odnosno godišnji finansijski izvještaj u zakonom utvrđenom roku,

d) ako turistička zajednica ne ispunjava zadatke zbog kojih je osnovana.

(2) Protiv rješenja iz stava (1) ovog člana nije dopuštena žalba, već se protiv njega može pokrenuti upravni spor u roku od 30 dana od dana dostave rješenja turističkoj zajednici.

#### Član 51.

##### (Povjerenik)

(1) Kada se raspusti skupština Turističke zajednice Kantona, Ministarstvo će rješenjem imenovati povjerenika u Turističkoj zajednici Kantona.

(2) Povjerenik osigurava djelovanje turističke zajednice i izvršavanje zakonom utvrđenih zadataka turističke zajednice do ustrojavanja novih organa turističke zajednice, te osigurava otklanjanje razloga zbog kojih je došlo do raspuštanja skupštine.

(3) Danom dostave rješenja o imenovanju povjerenika turističkoj zajednici, prestaju s radom svi organi turističke zajednice a njihove ovlasti preuzima povjerenik.

(4) Povjerenik može donositi ili mijenjati akte turističke zajednice samo ako je to potrebno radi provedbe zakona ili drugog propisa, ili usklađivanja sa zakonom ili drugim propisima.

(5) Povjerenik ne može donositi ili mijenjati program rada ili finansijski plan i ne može raspolagati imovinom turističke zajednice osim izvršenja isplate tekućih izdataka, te radi izvršenja prije preuzetih obaveza ili dovršenja prije započetih poslova.

(6) Povjerenik je obavezan osigurati konstituisanje nove skupštine u roku od 60 dana od dana raspuštanja skupštine.



(7) Protiv rješenja iz stava (1) ovog člana nije dopuštena žalba, već se protiv njega može pokrenuti upravni spor u roku od 30 dana od dana dostave rješenja turističkoj zajednici.

#### **Član 52.**

##### **(Inspeksijski nadzor)**

Inspeksijski nadzor nad provođenjem ovog zakona i propisa donesenih na osnovu ovog zakona, te pojedinačnih akata, uslova i načina rada nadziranih turističkih zajednica provodi Kantonalna uprava za inspeksijske poslove u okviru svoje nadležnosti, kao i općinski/gradski nadležni inspektori.

#### **Član 53.**

##### **(Ovlaštenja općinskih/gradskih inspektora)**

U obavljanju inspeksijskog nadzora općinski/gradski inspektori vrše nadzor nad pravnim i fizičkim licima koja pružaju usluge smještaja u pogledu primjene odredaba člana 33. stav (3), člana 34. stavovi (1), (2) i (3), člana 35. stav (1), člana 36. stav (3), i pravnim i fizičkim licima obveznicima plaćanja članskog doprinosa u pogledu primjene odredaba člana 40. stavovi (4) i (5) ovog zakona.

### **IX. PRESTANAK POSTOJANJA TURISTIČKE ZAJEDNICE**

#### **Član 54.**

##### **(Razlozi za prestanak postojanja turističke zajednice)**

(1) Turističke zajednice iz člana 5. tačaka a) i b) ovog zakona mogu prestati postojati na osnovu:

a) odluke skupštine turističke zajednice o prestanku postojanja turističke zajednice uz prethodnu saglasnost osnivača,

b) rješenja Ministarstva o zabrani djelovanja turističke zajednice.

(2) Rješenje iz stava (1) tačke b) ovog člana, Ministarstvo može donijeti iz razloga:

a) ako donosi opće akte suprotno zakonu, statutu ili drugom propisu, ili zbog povreda zakona i drugih propisa,

b) kada se u turističkoj zajednici ne održe izbori za novu skupštinu, u skladu sa zakonom i statutom,

c) kada se ni u roku od 60 dana od dana provedenih izbora ne konstituiše skupština turističke zajednice,

d) ako ne izvrši mjere koje je naložilo Ministarstvo.

(3) Protiv rješenja iz stava (2) ovog člana nije dopuštena žalba, već se protiv njega može pokrenuti upravni spor u roku od 30 dana od dana dostave rješenja turističkoj zajednici.

#### **Član 55.**

##### **(Okončanje djelovanja i raspolaganje imovinom u slučaju prestanka postojanja turističke zajednice)**

(1) Turistička zajednica Kantona čiji je član turistička zajednica koja prestaje postojati dužna je okončati poslove turističke zajednice općine/grada, odnosno područja, koji su u toku, naplatiti potraživanja i podmiriti povjerioce.

(2) Imovinu preostalu nakon namirenja povjerilaca u slučaju prestanka postojanja turističke zajednice općine/grada stiče općina/grad.

(3) Imovinu preostalu nakon namirenja povjerilaca, u slučaju prestanka postojanja turističke zajednice područja, stiču općine/gradovi u skladu sa visinom prihoda koje je ostvarivala turistička zajednica područja u okviru općine/grada, što utvrđuje Turistička zajednica Kantona na osnovu trogodišnjeg prosjeka u godinama koje su prethodile godini donošenja odluke, odnosno rješenja o prestanku postojanja turističke zajednice područja.

(4) U slučaju prestanka postojanja Turističke zajednice Kantona Ministarstvo je dužno okončati poslove Turističke

zajednice Kantona koji su u toku, naplatiti potraživanja i podmiriti povjerioce, a pravo raspolaganja imovinom koja preostane stiče Vlada Kantona.

#### **Član 56.**

##### **(Brisanje iz Upisnika)**

(1) Na osnovu odluke skupštine turističke zajednice, odnosno pravosnažnog rješenja o zabrani djelovanja turističke zajednice, Ministarstvo će brisati turističku zajednicu iz Upisnika.

(2) Brisanjem iz Upisnika turistička zajednica prestaje postojati.

### **X. KAZNE NE ODREDBE**

#### **Član 57.**

(1) Novčanom kaznom u iznosu od 1.000,00 KM do 5.000,00 KM kaznit će se za prekršaj turistička zajednica, ako:

a) započne obavljati djelatnost prije no što je upisana u Upisnik (član 4. stav (2));

b) ne prijavi promjenu upisanih podataka (član 4. stav (4));

c) donese statut i /ili izmjene i dopune statuta bez prethodne saglasnosti (član 8. stav (3));

d) ne objavi statut ili njegove izmjene i dopune u službenom glasilu (član 8. stav (5));

e) zaposleni u turističkom uredu ne ispunjavaju uslove propisane pravilnikom iz člana 14. stav (3) ovog zakona;

f) ne ostvaruje zakonom utvrđene zadatke (član 19. i 25.);

g) ne koristi finansijska sredstva u skladu s programom rada i finansijskim planom (član 43. stav (1));

h) ne donese program rada i finansijski plan u skladu sa odredbama člana 43. ovog zakona;

i) ne usvoji godišnji finansijski izvještaj u skladu sa odredbama člana 45. ovog zakona;

j) ne omogući Ministarstvu provedbu nadzora ili mu ne dostavi ili ne pripremi tačne i potpune izvještaje, podatke i druge materijale i obavijesti (član 48. stav (2));

k) ne otkloni nepravilnosti i nezakovitosti utvrđene nadzorom (član 49.).

(2) Za prekršaje iz stava (1) ovog člana kaznit će se novčanom kaznom u iznosu od 500,00 KM do 2.500,00 KM i odgovorno lice u turističkoj zajednici.

#### **Član 58.**

(1) Novčanom kaznom od 1.000,00 KM do 5.000,00 KM kaznit će se za prekršaj pravno lice koje pruža usluge smještaja, ako:

a) ne naplati boravišnu taksu istovremeno sa naplatom usluge (član 33. stav (3));

b) u računu posebno ne iskaže iznos boravišne takse ili ne navede osnove oslobođanja od njenog plaćanja (član 34. stav (1));

c) ne vodi ili netačno vodi evidenciju o uplaćenju taksi (član 34. stav (2));

d) u propisanom roku ne podnese nadležnom organu izvještaj o broju korisnika usluge smještaja i iznosu naplaćene boravišne takse (član 34. stav (3));

e) ne vrši prijavu i odjavu turista na propisan način (član 35. stav (1));

f) sredstva od naplaćene boravišne takse ne uplati u propisanom roku (član 36. stav (3)).

(2) Za prekršaj iz stava (1) ovog člana kaznit će se odgovorno lice u pravnom licu novčanom kaznom od 300,00 KM do 1.500,00 KM.

(3) Za prekršaj iz stava (1) ovog člana kaznit će se fizičko lice koje pruža usluge smještaja novčanom kaznom od 500,00 KM do 2.500,00 KM.

#### Član 59.

(1) Novčanom kaznom od 2.000,00 KM do 10.000,00 KM kaznit će se za prekršaj pravno lice obveznik plaćanja članskog doprinosa, ako:

- a) ne obračuna i u propisanom roku uplati članski doprinos (član 40. stav (4));
- b) uz uplatu članskog doprinosa (članarine) ne dostavi obrazac obračuna iz koga je jasno vidljivo kojoj općini/gradu, odnosno području pripada obračunati i uplaćeni članski doprinos (član 40. stav (5)).

(2) Za prekršaj iz stava (1) ovog člana kaznit će se odgovorno lice u pravnom licu novčanom kaznom od 500,00 KM do 2.500,00 KM.

(3) Za prekršaj iz stava (1) ovog člana kaznit će se fizičko lice koje pruža usluge smještaja novčanom kaznom od 500,00 KM do 2.500,00 KM.

### XI. PRIJELAZNE I ZAVRŠNE ODREDBE

#### Član 60.

(1) Turistička zajednica Kantona počinje s radom danom upisa u Upisnik.

(2) Danom početka rada Turističke zajednice Kantona, prestaje s radom dosadašnja Turistička zajednica Tuzlanskog kantona.

#### Član 61.

(1) Upisom u Upisnik, Turistička zajednica Kantona preuzima prostor za rad, imovinu, arhivu, predmete, akte i drugu dokumentaciju, te sredstva za rad dosadašnje Turističke zajednice Tuzlanskog kantona, kao i novčana sredstva utvrđena bilansom na dan upisa u Upisnik.

(2) Turistička zajednica Kantona i turističke zajednice općina/gradova i područja preuzimaju zaposlenike dosadašnje Turističke zajednice Tuzlanskog kantona, u skladu sa svojim aktima o unutrašnjoj organizaciji i sistematizaciji radnih mjesta.

(3) Na zaposlenike Turističke zajednice Tuzlanskog kantona, koji ne budu raspoređeni u skladu sa stavom (2) ovog člana primjenjuju se odredbe općih propisa o radu.

#### Član 62.

Propise iz člana 4. stav (6), člana 17. stav (2), člana 29. stav (4), člana 35. stav (2) i člana 40. stav (6) ovog zakona donijet će ministar u roku od tri mjeseca od dana stupanja na snagu ovog zakona.

#### Član 63.

Do donošenja odluke Vlade Kantona iz člana 33. stav (1) ovog zakona visina boravišne takse na području Kantona iznosi 2,00 KM po ostvarenom noćenju.

#### Član 64.

Ovaj zakon stupa na snagu osmog dana od dana objave u „Službenim novinama Tuzlanskog kantona“, a isti će biti usklađen sa federalnim zakonom koji će regulisati ovu oblast u roku od tri mjeseca od dana stupanja na snagu federalnog zakona.

Bosna i Hercegovina  
- Federacija Bosne i Hercegovine -  
TUZLANSKI KANTON  
Skupština  
Broj: 01-02-367-10/15  
Tuzla, 29.9.2015. godine

PREDSJEDNIK  
Skupštine Tuzlanskog  
kantona,  
Senad Alić, v.r.

## 592

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona“, br. 7/97, 3/99, i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj 29.9.2015. godine, donosi

## ZAKON

### O PLAĆAMA I NAKNADAMA IZABRANIH DUŽNOSNIKA, NOSILACA IZVRŠNIH FUNKCIJA I SAVJETNIKA U ORGANIMA ZAKONODAVNE I IZVRŠNE VLASTI TUZLANSKOG KANTONA

#### I. OSNOVNE ODREDBE

##### Član 1.

##### (Predmet zakona)

Ovim zakonom uređuju se plaće i naknade izabranih dužnosnika, nosilaca izvršnih funkcija i savjetnika u organima zakonodavne i izvršne vlasti u Tuzlanskom kantonu (u daljem tekstu: Kanton), kantonalnog pravobranioca i zamjenika kantonalnog pravobranioca i najviši iznosi neto plaća direktora i drugih rukovodilaca javnih preduzeća, javnih ustanova i drugih javnih službi čiji je osnivač Kanton i/ili se pretežno finansiraju iz budžeta Kantona ili kantonalnog vanbudžetskog fonda.

##### Član 2.

##### (Definicije pojmova korištenih u zakonu)

Pojmovi korišteni u ovom zakonu imaju sljedeće značenje:

- 1) „izabrani dužnosnici“ su poslanici Skupštine Tuzlanskog kantona (u daljem tekstu: Skupština Kantona);
- 2) „nosioci izvršnih funkcija“ su: članovi Vlade Tuzlanskog kantona (u daljem tekstu: Vlada Kantona);
- 3) „savjetnicima“ se smatraju savjetnici predsjednika Skupštine Kantona i premijera Tuzlanskog kantona (u daljem tekstu: premijer Kantona);
- 4) „koeficijent“ predstavlja brojčanu vrijednost koja se iskazuje arapskim brojevima za svaku poziciju radnog mjesta koje su razvrstane u platne razrede i služi za utvrđivanje visine osnovne plaće;
- 5) „osnovica za obračun plaće“ predstavlja novčani iznos u konvertibilnim markama (u daljem tekstu: KM) koji se koristi za određivanje osnovne plaće.

##### Član 3.

##### (Budžetsko osiguranje sredstava za plaće i naknade)

Finansijska sredstva za plaće, naknade i druga primanja lica iz člana 1. ovog zakona predviđena ovim zakonom planiraju se i osiguravaju u Budžetu Tuzlanskog kantona (u daljem tekstu: Budžet Kantona).

##### Član 4.

##### (Način utvrđivanja osnovice za obračun plaće)

- (1) Plaća lica iz člana 1. ovog zakona utvrđuje se u bruto i neto iznosu.
- (2) Plaća u bruto iznosu obuhvata neto plaću, poreze i doprinose.
- (3) Plaća izabranih dužnosnika koji imaju profesionalni status, nosilaca izvršnih funkcija i savjetnika predsjednika Skupštine utvrđuje se rješenjem kojeg donosi Administrativna komisija Skupštine Tuzlanskog kantona (u daljem tekstu: Administrativna komisija).



(4) Plaća savjetnika premijera Kantona, kantonalnog pravobranioca i zamjenika kantonalnog pravobranioca utvrđuje se rješenjem kojeg donosi premijer Kantona.

(5) Rješenje iz stavova (3) i (4) ovog člana sadrži: lične podatke izabranog dužnosnika, nosioca izvršnih funkcija i savjetnika i pravobranioca, položaj na koji je postavljen, platni razred i sve elemente koji su uzeti u obzir za utvrđivanje visine plaće.

(6) Visina osnovice za obračun plaće utvrđuje se na osnovu najniže neto satnice na način da se najniža neto satnica množi sa fondom radnih sati u mjesecu.

(7) Osnovicu za obračun plaća utvrđuje Administrativna komisija u iznosu kao za zaposlene kod budžetskih korisnika, prije donošenja budžeta za narednu fiskalnu godinu.

#### Član 5.

##### (Elementi za utvrđivanje osnovne plaće)

(1) Osnovna plaća se utvrđuje množenjem osnovice za plaću iz člana 4. stav (7) ovog zakona sa utvrđenim koeficijentom platnog razreda i tako utvrđeni iznos uvećava se za 0,5% za svaku započetu godinu penzijskog staža, a najviše do 20%.

(2) Osnovna plaća obračunava se i iskazuje mjesečno za puno radno vrijeme, prema radnom mjestu i odgovarajućem platnom razredu.

(3) Puno radno vrijeme je 40 sati sedmično.

#### II. PLAĆE I NAKNADE IZABRANIH DUŽNOSNIKA, NOSILACA IZVRŠNIH FUNKCIJA I SAVJETNIKA U ORGANIMA ZAKONODAVNE I IZVRŠNE VLASTI

#### Član 6.

##### (Vrijeme ostvarivanja prava)

(1) Lica iz člana 1. ovog zakona, osim izabranih dužnosnika koji nemaju profesionalni status, imaju pravo na plaću i naknade utvrđene ovim zakonom.

(2) Lica iz člana 1. ovog zakona ostvaruju pravo na plaću i druge naknade u skladu sa ovim zakonom.

(3) Izabrani dužnosnici, prava iz stava (1) ovog člana ostvaruju od dana naznačenog u zahtjevu za profesionalno obavljanje dužnosti podnesenom Administrativnoj komisiji, ali ne prije od dana podnošenja zahtjeva.

(4) Nosioci izvršnih funkcija, prava iz stava (1) ovog člana, ostvaruju danom stupanja na dužnost.

(5) Nosioci izvršnih funkcija stupaju na dužnost danom davanja zakletve u Skupštini Kantona.

(6) Savjetnici, kantonalni pravobranilac i zamjenici kantonalnog pravobranioca prava iz stava (1) ovog člana, ostvaruju preuzimanjem dužnosti, odnosno stupanjem na posao.

#### Član 7.

##### (Pravo izabranih dužnosnika na ime povećanih materijalnih troškova u obavljanju svoje dužnosti, naknada za prisustvo sjednici kolegija, naknada vanskupštinskim članovima radnih tijela Skupštine Kantona i naknada za rad članovima Nezavisnog odbora)

(1) Izabrani dužnosnici koji imaju profesionalni status imaju pravo na stalno mjesečno novčano primanje (paušal) na ime povećanih materijalnih troškova u obavljanju svoje dužnosti koje ne može biti veće od tri osnovice, a za izabrane dužnosnike koji nemaju profesionalni status ne može biti veće od četiri osnovice iz člana 4. stav (7) ovog zakona.

(2) Visinu paušala iz stava (1) ovog člana utvrđuje

Administrativna komisija posebnom odlukom.

(3) Pravo iz stava (1) ovog člana izabrani dužnosnici mogu ostvariti samo po jednom osnovu, odnosno na jednom nivou zakonodavne vlasti, odnosno, predstavničkog tijela grada/općine.

(4) Pravo na mjesečnu naknadu za prisustvo sjednici Kolegija Skupštine Kantona u visini jedne osnovice iz člana 4. stav (7) ovog zakona pod uslovom da je održana najmanje jedna sjednica u mjesecu imaju članovi Kolegija Skupštine Kantona, izuzev predsjednika i zamjenika predsjednika Skupštine Kantona ukoliko imaju profesionalni status.

(5) Iznos paušala umanjuje se za 10% za svako odsustvovanje sa sjednice Skupštine Kantona ili radnog tijela čiji je član, odnosno za 10% od naknade za svako odsustvovanje sa sjednice radnog tijela vanskupštinskog člana. Evidenciju o izostancima vodi sekretar Skupštine Kantona ili drugi službenik zadužen da prati rad radnog tijela.

(6) Vanskupštinski članovi radnih tijela Skupštine Kantona, imaju pravo na mjesečnu naknadu za prisustvo radnom tijelu Skupštine Kantona u visini 0,7 osnovice iz člana 4. stav (7) ovog zakona, pod uslovom da je održana najmanje jedna sjednica u mjesecu i bez obzira na broj radnih tijela čiji su članovi.

(7) Članovi Nezavisnog odbora imaju pravo na mjesečnu naknadu za rad u visini 0,7 osnovice iz člana 4. stav (7) ovog zakona, pod uslovom da je održana najmanje jedna sjednica u mjesecu.

(8) Visinu naknade iz stavova (6) i (7) ovog člana utvrđuje Administrativna komisija Skupštine Kantona posebnom odlukom.

#### Član 8.

##### (Položajni dodatak)

(1) Izabranim dužnosnicima i nosiocima izvršnih funkcija pripada pravo na položajni dodatak do 10% od iznosa njihove plaće.

(2) Visinu položajnog dodatka licima iz stava (1) ovog člana utvrđuje rješenjem Administrativna komisija.

#### Član 9.

##### (Platni razredi i koeficijenti)

(1) Platni razredi i koeficijenti izabranih dužnosnika, nosilaca izvršnih funkcija, savjetnika u organima zakonodavne i izvršne vlasti u Kantonu, kantonalnog pravobranioca i zamjenika kantonalnog pravobranioca su:

Platni razred	Radno mjesto	Koeficijent
I	Predsjednik Skupštine Kantona	8,50
II	Premijer Kantona	8,20
III	Ministri u Vladi Kantona	6,75
IV	Kantonalni pravobranilac	6,45
V	Zamjenici predsjednika Skupštine Kantona	6,00
VI	Zamjenici kantonalnog pravobranioca	5,40
VII	Savjetnici izabranih dužnosnika i nosilaca izvršnih funkcija	4,50
VIII	Poslanik u Skupštini Kantona	3,40

(2) Osnovna plaća lica iz člana 1. ovog zakona utvrđuje se prema članu 5. stav (1) ovog zakona.

**Član 10.****(Naknada plaće zbog bolesti ili povrede)**

(1) Lica iz člana 1. ovog zakona, sa izuzetkom izabраних dužnosnika koji nemaju profesionalni status, za prvih 42 dana odsutnosti s posla zbog bolesti ili povrede, imaju pravo na naknadu plaće u visini 90% od neto plaće koju je ostvario u mjesecu koji je prethodio nastupanju slučaja po kojem se ostvaruje pravo na naknadu.

(2) Lica iz člana 1. ovog zakona, sa izuzetkom izabраних dužnosnika koji nemaju profesionalni status, imaju pravo na naknadu plaće u visini od 80% plaće koju su ostvarili za prethodni mjesec prije odsutnosti s posla zbog bolesti ili povrede za odsutnost s posla duže od 42 dana a najduže do kraja mandata.

(3) Lica iz člana 1. ovog zakona, sa izuzetkom izabраних dužnosnika koji nemaju profesionalni status, imaju pravo na naknadu plaće u punom iznosu koju su ostvarili za prethodni mjesec ako je do odsutnosti s posla došlo iz razloga povrede na radu i oboljenja od profesionalne bolesti, bolesti i poremećaja prouzrokovanih trudnoćom i porođajem, transplantacije živog tkiva i organa u korist drugog lica.

**Član 11.****(Naknada za troškove ishrane)**

(1) Lica iz člana 1. ovog zakona, sa izuzetkom izabраних dužnosnika koji nemaju profesionalni status, imaju pravo na naknadu troškova ishrane (topli obrok) u visini koju utvrđuje Vlada Kantona za sve zaposlene kod budžetskih korisnika, u skladu sa sredstvima planiranim Budžetom.

(2) Naknada iz stava (1) ovog člana neće se obračunavati za vrijeme odsutnosti s posla po osnovu službenog puta, plaćenog/neplaćenog odsustva, bolovanja ili godišnjeg odmora.

**Član 12.****(Naknada za godišnji odmor i plaćeni dopust)**

(1) Lica iz člana 1. ovog zakona, sa izuzetkom izabраних dužnosnika koji nemaju profesionalni status imaju pravo na naknadu za vrijeme godišnjeg odmora (regres), u visini koji utvrđuje Vlada Kantona za sve zaposlene kod budžetskih korisnika, u skladu sa sredstvima planiranim Budžetom Kantona.

(2) Lica iz člana 1. ovog zakona, sa izuzetkom izabраних dužnosnika koji nemaju profesionalni status, imaju pravo na naknadu plaće u visini osnovne plaće, za tekući mjesec, uvećanu za minuli rad, u sljedećim slučajevima:

- godišnjeg odmora radnika,
- odsustva sa posla do sedam radnih dana u jednoj kalendarskoj godini, radi stupanja u brak, porođaja braćnog partnera, zbog teže bolesti i smrti člana uže porodice, odnosno člana domaćinstva, preseljenja, obavljanje nekog posla kod državnog organa ili suda,
- odsustva sa posla u trajanju pet dana u jednoj kalendarskoj godini za pripremanje i polaganje stručnog ispita ili drugog ispita koji predstavlja uslov za obavljanje poslova radnog mjesta na koje se raspoređuje,
- odsustva sa posla u trajanju dva radna dana u jednoj kalendarskoj godini, radi zadovoljavanja kulturnih, vjerskih, sportskih i drugih ličnih potreba,
- odsustva sa posla radi stručnog usavršavanja i osposobljavanja, prekvalifikacije i dokvalifikacije, u skladu sa potrebama organa ili službe u kojoj je angažovan.

**Član 13.****(Naknada za slučaj teške bolesti, teške invalidnosti ili smrti)**

(1) U slučaju teške bolesti ili invalidnosti lica iz

člana 1. ovog zakona ili člana njegove uže porodice, sa izuzetkom izabраних dužnosnika koji nemaju profesionalni status, isplaćuje se jednokratna novčana pomoć u visini jedne prosječne neto plaće isplaćene u Federaciji Bosne i Hercegovine prema zadnjem objavljenom statističkom podatku.

(2) U slučaju smrti lica iz člana 1. ovog zakona, sa izuzetkom izabраних dužnosnika koji nemaju profesionalni status, njegovoj porodici se isplaćuju troškovi sahrane u visini tri prosječne neto plaće isplaćene u Federaciji Bosne i Hercegovine prema zadnjem objavljenom statističkom podatku.

(3) Lica iz člana 1. ovog zakona, sa izuzetkom izabраних dužnosnika koji nemaju profesionalni status, u slučaju smrti člana njihove uže porodice imaju pravo na isplatu troškova sahrane u visini od dvije prosječne neto plaće isplaćene u Federaciji Bosne i Hercegovine prema zadnjem objavljenom statističkom podatku.

(4) Pod teškom bolešću u smislu stava (1) ovog člana, a koja se dokazuje dijagnozom utvrđenom od strane ovlaštene zdravstvene ustanove, se podrazumijevaju:

**1. RESPIRATORNE BOLESTI:**

- bolesti pluća praćene trajnim oštećenjem respiratorne funkcije (sa vrijednostima FVC, FEV 1 I FEV 1- FVC ispod 40%),

- apsces pluća i medijastinuma,
- pitorax,
- respiratorni distress sindrom.

**2. BOLESTI KOŠTANO - MIŠIĆNOG SISTEMA I VEZIVNOG TKIVA**

- direktna infekcija zglobova kod infektivnih i parazitskih oboljenja,

- seropozitivni reumativni artitis kada je bolesnik nesposoban za bilo kakve aktivnosti ili vezan za postelju i invalidska kolica,

- ankilozirajući spondilitis,

- protruzija intervertebralnog diskusa praćene komplikacijama (težim funkcionalnim oštećenjem nerava, mišića, popuštanjem sfinktera) zahtijevaju intezivan i dugotrajan tretman,

- kao i bolesti koje uzrokuju ozbiljne funkcionalne smetnje i lokomotornog aparata, vežu bolesnika za postelju i trajno ga onemogućavaju u svakodnevnim radnim aktivnostima.

**3. NEUROMIŠIĆNE BOLESTI**

- progresivna neuromišićna oboljenja,

- multipla skleroza,

- mijastenija gravis,

- epilepsija nekontrolirana ili rezistentna na terapiju,

- nezarazni encefalitis i encefalomijalitis.

**4. SPECIFIČNA STANJA KOJA ZAHTIJEVAJU SKUPI I DOŽIVOTNI TRETMAN**

- transplantacije organa,

- transplantacija koštane srži,

- stanja poslije operativnih zahvata na srcu, mozgu i plućima koja zahtijevaju duže bolničko liječenje, rehabilitaciju i intenzivni medikamentozni tretman.

**5. OSTALA OBOLJENJA**

- infarkt (srčani ili moždani),

- maligni tumori.

(5) Pod teškom invalidnosti u smislu stava (1) ovog člana podrazumijeva se invalidnost utvrđena u procentu 90% i više oštećenja organizma.

(6) Pod članom uže porodice u smislu ovog zakona podrazumijeva se: braćni partner, očuh, maćeha, usvojitelj, djeca, roditelji, a unučad bez roditelja, braća i sestre ako sa licem iz člana 1. ovog zakona, sa izuzetkom izabраних dužnosnika koji nemaju profesionalni status, žive u zajedničkom domaćinstvu.



**Član 14.****(Pravo na osiguranje od posljedica nesretnog slučaja)**

(1) Lica iz člana 1. ovog zakona, sa izuzetkom izabranih dužnosnika koji nemaju profesionalni status, imaju pravo na osiguranje od posljedica nesretnog slučaja sa uključenim rizikom od prirodne smrti za vrijeme trajanja radnog odnosa.

(2) Visina osiguranja po ovoj osnovi određuje se prema polici osiguranja od posljedica nesretnog slučaja odnosno polici osiguranja od prirodne smrti.

(3) Ugovor o osiguranju sa odgovarajućom osiguravajućom kućom zaključuje se kao i za sve ostale zaposlene u organu.

**Član 15.****(Otpremnina)**

Lica iz člana 1. ovog zakona, sa izuzetkom izabranih dužnosnika koji nemaju profesionalni status, imaju pravo na isplatu otpremnine prilikom odlaska u penziju u visini šest prosječnih neto plaća ostvarenih u Federaciji Bosne i Hercegovine prema posljednjem objavljenom podatku Federalnog zavoda za statistiku ili u visini najmanje šest posljednjih njegovih obračunatih ili isplaćenih plaća, ako je to za lice povoljnije.

**Član 16.****(Naknada troškova za službeno putovanje)**

(1) Lica iz člana 1. ovog zakona, sa izuzetkom izabranih dužnosnika koji nemaju profesionalni status, upućena na službeno putovanje imaju pravo na naknadu troškova dnevnice, noćenja, prijevoza i ostalih izdataka nastalih u vezi sa službenim putovanjem.

(2) Službenim putovanjem, u smislu ovog člana, smatra se obavljanje poslova izvan sjedišta institucije u kome lice obavlja svoju funkciju, van područja Kantona.

(3) Visina dnevnica i drugih troškova službenog putovanja i način njihovog obračuna isplaćuju se u visini utvrđenoj aktom Vlade Kantona.

**Član 17.****(Naknada za porodijski dopust)**

Lica iz člana 1. ovog zakona, sa izuzetkom izabranih dužnosnika koji nemaju profesionalni status, za vrijeme porodijskog dopusta imaju pravo na naknadu plaće prema propisima Kantona kojim se uređuje ova oblast.

**Član 18.****(Naknada za prijevoz)**

(1) Licu iz člana 1. ovog zakona, sa izuzetkom izabranih dužnosnika koji nemaju profesionalni status, pripada karta za prijevoz u javnom saobraćaju, ukoliko koristi prijevoz javnim saobraćajem, ili novčana naknada u visini cijene mjesečne karte za najjeftiniji prijevoz, ako je mjesto stanovanja od mjesta rada udaljeno najmanje dva kilometra.

(2) Udaljenost od mjesta rada određuje se na osnovu najkraće putne komunikacije od adrese u mjestu stanovanja.

**Član 19.****(Prestanak prava)**

Prava utvrđena ovim zakonom prestaju danom prestanka vršenja dužnosti.

**Član 20.****(Najviši iznos plaće)**

(1) Najviši iznos neto plaće, bez minulog rada, direktora i drugih rukovodilaca javnih preduzeća, javnih ustanova i drugih javnih službi čiji je osnivač Kanton i/ili se pretežno finansiraju iz Budžeta Kantona ili kantonalnog

vanbudžetskog fonda, ne može prelaziti iznos neto plaće koja je u skladu sa ovim zakonom utvrđena ministru.

(2) Izuzetno, od stava 1. ovog člana, najviši iznos neto plaće, bez minulog rada, direktora JZU UKC Tuzla i rektora JU Univerzitet u Tuzli ne može prelaziti iznos neto plaće koja je u skladu sa ovim zakonom utvrđena premijeru Kantona.

(3) Pod neto plaćom u smislu ovog člana, podrazumijeva se plaća dobijena množenjem koeficijenta za obračun plaće sa utvrđenom osnovicom za obračun i dodatim eventualnim dodacima na plaću, bez minulog rada.

**III. NADZOR NAD PRIMJENOM OVOG ZAKONA****Član 21.****(Organi nadležni za vršenje nadzora)**

(1) Nadzor nad primjenom ovog zakona vrši Ministarstvo finansija.

(2) Ukoliko Ministarstvo finansija u postupku nadzora, utvrdi da su novčana primanja (plaće, paušal i naknade) utvrđena u većem iznosu u odnosu na maksimalno predviđene ovim zakonom, izvršit će privremenu obustavu isplata do usklađivanja istih sa odredbama ovog zakona.

(3) Izuzetno, od stava (1) ovog člana, nadzor nad primjenom člana 20. ovog zakona vrši nadležni vanbudžetski fond, odnosno službe za finansije kod pravnih lica koja nisu obuhvaćena nadzorom nadležnih vanbudžetskih fondova.

(4) Ukoliko nadležni organ iz stava (3) ovog člana, u postupku nadzora, utvrdi da je najviši iznos neto plaće, isplaćen u višem iznosu, od utvrđenog članom 20. ovog zakona, izvršit će posebnim nalogom, privremenu obustavu isplate, do usklađivanja sa najvišim utvrđenim neto iznosom.

**IV. KAZNE NE ODREDBE****Član 22.****(Kazne)**

Novčanom kaznom u iznosu od 500 KM do 2.000 KM kaznit će se za prekršaj lice ili članovi tijela ovlašteni za odlučivanje o pravima i obavezama, ako:

- ne donese rješenje o plaći ili rješenje o promjeni visine plaće za lica utvrđena članom 4. stav (4) ovog zakona,
- odredi najviši iznos neto plaća suprotno članu 20. ovog zakona.

**V. PRIJELAZNE I ZAVRŠNE ODREDBE****Član 23.****(Prestanak važenja)**

Danom stupanja na snagu ovog zakona prestaju da važe:

- Odluka o utvrđivanju plaća i naknada funkcionera koje bira ili imenuje Skupština Tuzlanskog kantona i naknada za vršenje funkcije poslanicima u Skupštini Tuzlanskog kantona („Službene novine Tuzlanskog kantona“, br. 2/02, 8/04, 12/04, 8/07, 4/09, 12/10, 7/12, 2/13 i 3/14),
- Odluka o utvrđivanju plaća i drugih ličnih primanja kantonalnog pravobranioca i zamjenika kantonalnog pravobranioca („Službene novine Tuzlanskog kantona“, br. 12/06 i 7/09),
- Odluka o utvrđivanju plaća i drugih ličnih primanja članova Vlade Tuzlanskog kantona („Službene novine Tuzlanskog kantona“, broj: 7/01),
- Odluka o utvrđivanju prava na naknadu Nezavisnom odboru broj: 02-02-345-1/13 od 23.05.2013. godine.

**Član 24.**

Podzakonski akt kojim se reguliše profesionalni status poslanika Skupštine Kantona, primjenjivat će se u dijelu koji nije u suprotnosti sa odredbama ovog zakona.

**Član 25.**

Ovaj zakon stupa na snagu narednog dana od dana objavljivanja u „Službenim novinama Tuzlanskog kantona“, a primjenjivat će se od narednog mjeseca u odnosu na mjesec u kome je stupio na snagu.

Bosna i Hercegovina  
- Federacija Bosne i Hercegovine -  
TUZLANSKI KANTON

Skupština  
Broj: 01-02-641-5/15  
Tuzla, 29.9.2015. godine

PREDSJEDNIK  
Skupštine Tuzlanskog  
kantona,

Senad Alić, v.r.

**593**

Na osnovu člana 24. stav (1) tačka c) Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj 29.9.2015. godine, d o n o s i

**Z A K O N****O IZMJENAMA I DOPUNAMA ZAKONA O  
JAVNOM OKUPLJANJU****Član 1.**

U Zakonu o javnom okupljanju („Službene novine Tuzlanskog kantona“, broj 1/12) iza člana 11., dodaje se novi član 11a., koji glasi:

**„Član 11a.**

(Aktivnosti policijskih službenika nakon prijema prijave mirnog okupljanja i javnog protesta)

(1) Ako prijava ne sadrži sve potrebne podatke propisane u članu 11. ovog zakona, nadležni organ obavezan je od lica koje je predalo prijavu tražiti da istu dopuni u roku od 24 sata od vremena podnošenja prijave.

(2) Ako se u navedenom roku ne izvrši dopuna prijave sa svim traženim podacima, smatrat će se da prijava nije ni podnesena.

(3) Mirno okupljanje, za koje prijava nije podnesena u skladu sa stavovima (1) i (2) ovog člana, smatrat će se kao mirno okupljanje bez prijave iz člana 15. ovog zakona, o čemu će biti upoznat podnosilac prijave.“

**Član 2.**

U članu 13. dodaje se novi stav (2), koji glasi:

„(2) Ako se javno okupljanje prijavljuje za više lokacija, potrebno je za svaku lokaciju navesti vrijeme početka i završetka okupljanja.“

**Član 3.**

Iza člana 13. dodaje se novi član 13a., koji glasi:

**„Član 13a.**

(Vrijeme održavanja mirnog okupljanja)

Mirno okupljanje se može održati u vremenu od 08,00 do 22,00 sata.“

**Član 4.**

(1) U članu 14., u tački b) riječ „bolnica“ zamjenjuje se riječima „zdravstvenih ustanova“.

(2) U istom članu iza tačke f), dodaje se nova tačka

g), koja glasi:

„g) u blizini objekata koji se posebno osiguravaju, na udaljenosti koju procijeni policijski organ nadležan za osiguranje tog objekta.“

**Član 5.**

U članu 15. ispred riječi „Općinsko“ dodaju se riječi „Gradsko odnosno“.

**Član 6.**

U članu 26., iza tačke h) dodaje se nova tačka i), koja glasi:

„i) Ako se mirno okupljanje održava na prostoru suprotno odluci iz člana 15. Zakona“.

**Član 7.**

(1) U članu 38. u stavu (1) u tački b) iza teksta „čl. 11. stav (1),“ dodaje se tekst „13. stav (2), 13a.,“.

(2) U istom članu i stavu iza tačke j) dodaje se nova tačka k), koja glasi:

„k) održava ili održi javno okupljanje koje nije blagovremeno prijavljeno, kada je prijavljivanje obavezno (član 10. stavovi (4) i (5), član 31. stav (2) i član 36. stav (2)).“

**Član 8.****(Stupanje na snagu)**

Ovaj zakon stupa na snagu narednog dana od dana objavljivanja u „Službenim novinama Tuzlanskog kantona“.

Bosna i Hercegovina  
- Federacija Bosne i Hercegovine -  
TUZLANSKI KANTON  
Skupština

Broj: 01-02-614-4/15  
Tuzla, 29.9.2015. godine

PREDSJEDNIK  
Skupštine Tuzlanskog  
kantona,

Senad Alić, v.r.

**594**

Na osnovu člana 24. stav 1. tačke c) Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj 29.9.2015. godine, d o n o s i

**Z A K O N****O IZMJENAMA I DOPUNAMA ZAKONA O  
SOCIJALNOJ ZAŠTITI, ZAŠTITI CIVILNIH  
ŽRTAVA RATA I ZAŠTITI PORODICE SA DJECOM****Član 1.**

U Zakonu o socijalnoj zaštiti, zaštiti civilnih žrtava rata i zaštiti porodice sa djecom – prečišćeni tekst („Službene novine Tuzlanskog kantona“, br. 5/12 i 7/14), u članu 1. alineji 3. riječi „i drugih ustanova i službi“ zamjenjuju se riječima „i uslovi za obavljanje djelatnosti socijalne zaštite pravnih i fizičkih lica“.

**Član 2.**

U članu 6. stav 3. mijenja se i glasi:

„Izuzetno od stava 2. ovog člana, povratnicima iz Kantona koji su se vratili u prijeratna prebivališta na područje Republike Srpske i Brčko Distrikta omogućava se nastavak korištenja prava na socijalnu zaštitu, zaštitu civilnih žrtava rata i zaštitu porodice sa djecom u skladu sa Federalnim zakonom i ovim zakonom“.



**Član 3.**

U članu 12. dodaje se novi stav 2., koji glasi:

„Pravo na stalnu novčanu pomoć ne ostvaruje lice ukoliko je smješteno u drugu porodicu ili ustanovu socijalne zaštite, na teret sredstava kantonalnog budžeta“.

**Član 4.**

U članu 15. u stavu 1., iza tačke 6. dodaju se nove tačke 7. i 8., koje glase:

„7. Materijalna naknada za vrijeme nezaposlenosti.

8. Naknada po osnovu alimentacije“.

U istom članu stav 4. mijenja se i glasi:

„Prihodom u smislu stava 1. ovog člana ne smatra se lična invalidnina, novčana naknada za pomoć i njegu od strane drugog lica, ortopedski dodatak, stalna novčana pomoć, dodatak na djecu i stipendije učenika i studenata“.

**Član 5.**

U članu 16. u stavu 2. riječ „mu“ zamjenjuje se riječju „njegovi“. U istom članu, iza stava 2. dodaje se novi stav 3., koji glasi:

„Ukoliko se radi o srođnicima koji su zbog starosti nesposobni za samostalan rad i privređivanje ili imaju utvrđen gubitak radne sposobnosti od strane Instituta za medicinsko vještačenje zdravstvenog stanja, smatra se da nisu u mogućnosti učestvovati u izdržavanju ukoliko im prihodi po članu domaćinstva ne prelaze 60% prosječne plaće“.

**Član 6.**

Iza člana 16. podnaslov: „b) Novčana naknada za pomoć i njegu od strane drugog lica“ briše se.

**Član 7.**

U članu 24. u stavu 1., iza riječi „pomoći“ dodaju se riječi „i članova uže porodice“.

U istom članu, iza stava 1. dodaje se novi stav 2., koji glasi:

„Pod članovima uže porodice, u smislu ovog zakona, podrazumijevaju se bračni partner, djeca i usvojenici“.

Dosadašnji stav 2. postaje stav 3.

**Član 8.**

Član 26. mijenja se i glasi:

„Lice koje se, radi osposobljavanja za život i rad, upućuje na internatski smještaj ima pravo na troškove smještaja, ishrane i prijevoza od mjesta stanovanja do internatskog smještaja, pod uslovima utvrđenim ovim zakonom“.

**Član 9.**

Član 27. mijenja se i glasi:

„Troškove internatskog smještaja, ishrane i prijevoza snosi smješteno lice do visine cijene smještaja, ishrane i prijevoza.

Ako smješteno lice nema prihoda, odnosno njegovi prihodi nisu dovoljni za potpuno snošenje troškova smještaja, ishrane i prijevoza iz stava 1. ovog člana, troškove smještaja, ishrane i prijevoza ili njihov dio snose roditelji, usvojitelji ili srođnici koji su po zakonu dužni da ga izdržavaju, ako prihodi po članu njihovog domaćinstva prelaze visinu od 30% prosječne plaće, ili drugo pravno ili fizičko lice koje je preuzelo obavezu izdržavanja smještenog lica.

Ako smješteno lice nema obveznike izdržavanja iz stava 2. ovog člana ili prihodi tih lica ne prelaze visinu od 30% prosječne plaće po članu njihovog domaćinstva, troškove smještaja, ishrane i prijevoza u cjelosti snosi Ministarstvo.

Visinu učešća lica iz stava 2. ovog člana, u troškovima iz stava 1. ovog člana, utvrđuje centar za socijalni rad, u iznosu koji ne može biti veći od 30% od ukupnog prihoda svih članova domaćinstva.

Troškove internatskog smještaja, ishrane i prijevoza za djecu sa smetnjama u psihičkom i fizičkom razvoju snosi Ministarstvo“.

**Član 10.**

U članu 30. iza riječi „Federalnim“, dodaju se riječi „i ovim“.

U istom članu dodaje se stav 2., koji glasi:

„Prije smještaja lica u drugu porodicu centar za socijalni rad je obavezan pribaviti saglasnost Ministarstva“.

**Član 11.**

Član 32. mijenja se i glasi:

„Troškove smještaja u drugu porodicu snosi smješteno lice do visine cijene smještaja.

Ako smješteno lice nema prihoda, odnosno njegovi prihodi nisu dovoljni za potpuno snošenje troškova smještaja iz stava 1. ovog člana, troškove smještaja ili njihov dio snose roditelji, usvojitelji ili srođnici koji su po zakonu dužni da ga izdržavaju, ako prihodi po članu njihovog domaćinstva prelaze visinu od 30% prosječne plaće, ili drugo pravno ili fizičko lice koje je preuzelo obavezu izdržavanja smještenog lica.

Ako smješteno lice nema obveznike izdržavanja iz stava 2. ovog člana ili njegovi obveznici izdržavanja nemaju dovoljno prihoda, a smješteno lice ima imovinu, učestvuje u troškovima smještaja sa svojom imovinom u visini i pod uslovima koje propisuje ministar.

Ako smješteno lice ima imovinu, ali ta imovina nije dovoljna za potpuno učešće u troškovima smještaja, troškove smještaja do punog iznosa snosi Ministarstvo.

Ako smješteno lice nema imovinu ili obveznike izdržavanja iz stava 2. ovog člana ili prihodi tih lica ne prelaze visinu od 30% prosječne plaće po članu njihovog domaćinstva, troškove smještaja u cjelosti snosi Ministarstvo.

Visinu učešća lica iz stava 2. ovog člana u troškovima iz stava 1. ovog člana, utvrđuje centar za socijalni rad, u iznosu koji ne može biti veći od 30% od ukupnog prihoda svih članova domaćinstva.

Troškove smještaja za djecu bez roditeljskog staranja i za djecu sa smetnjama u psihičkom i fizičkom razvoju u cjelosti snosi Ministarstvo“.

**Član 12.**

U članu 34. dodaje se novi stav 2., koji glasi:

„Prije smještaja lica u ustanovu socijalne zaštite centar za socijalni rad je obavezan pribaviti saglasnost Ministarstva“.

**Član 13.**

Član 35. mijenja se i glasi:

„Troškove smještaja u ustanovu socijalne zaštite snose lica iz člana 32. stavovi 1. i 2. ovog zakona i na način utvrđen u stavovima 3. i 6. istog člana, a Ministarstvo na način utvrđen u stavovima 4., 5. i 7. istog člana.“

**Član 14.**

U članu 38. u stavu 1., alineja 4. mijenja se i glasi:

„djeca od rođenja do polaska u osnovnu školu, koja nisu osigurana po drugom osnovu“.

**Član 15.**

Iza člana 39. u podnaslovu „11.“, iza riječi „zaštite“ dodaje se zarez i riječi „i uslovi za obavljanje djelatnosti socijalne zaštite prirodnih i fizičkih lica“.

**Član 16.**

Član 41. mijenja se i glasi:

„Ministarstvo donosi rješenje o ispunjavanju uslova za obavljanje djelatnosti socijalne zaštite, zaštite civilnih žrtava rata i zaštite porodice sa djecom za pravna i fizička lica koja mogu obavljati ovu djelatnost u skladu sa članovima 3. i 4. Federalnog zakona.

Protiv rješenja Ministarstva nije dopuštena žalba ali se može pokrenuti upravni spor kod nadležnog suda.

Pravilnik kojim se utvrđuju uslovi u pogledu prostora, opreme i kadra za obavljanje djelatnosti socijalne zaštite, zaštite civilnih žrtava rata i zaštite porodice sa djecom donijet će ministar.

**Član 17.**

Član 42. mijenja se i glasi:

„Kad utvrdi da pravna i fizička lica iz članova 3. i 4. Federalnog zakona ne ispunjavaju zakonom propisane uslove za obavljanje djelatnosti socijalne zaštite, zaštite civilnih žrtava rata i zaštite porodice sa djecom, Ministarstvo određuje rok u kojem su isti dužni otkloniti utvrđene nedostatke.

Ukoliko lica iz stava 1. ovog člana ne otklone nedostatke u utvrđenom roku, Ministarstvo donosi rješenje da ista ne ispunjavaju uslove za početak obavljanja djelatnosti i rješenje dostavlja nadležnom organu na dalje postupanje“.

**Član 18.**

U članu 44. stav 2. mijenja se i glasi:

„Javnu ustanovu u oblasti socijalne zaštite može osnovati Skupština Kantona i općinsko vijeće samostalno ili sa drugim pravnim i fizičkim licem“.

U istom članu, iza stava 2. dodaje se novi stav 3., koji glasi:

„Javnu ustanovu u oblasti socijalne zaštite može osnovati crkva i vjerska zajednica, samostalno i sa drugim pravnim i fizičkim licem, kada Skupština Kantona utvrdi da za to postoji javni interes“.

**Član 19.**

U članu 45. u stavu 1., riječi „Ustanove su dužne“ zamjenjuju se riječima „Pravna i fizička lica iz članova 3. i 4. Federalnog zakona su dužna“.

**Član 20.**

U članu 46. u stavu 1., riječ „ustanova“ zamjenjuje se riječima „pravnih i fizičkih lica iz članova 3. i 4. Federalnog zakona“.

**Član 21.**

U članu 62. stav 2. mijenja se i glasi:

„Domovi i drugi oblici smještaja osiguravaju smještaj i zaštitu lica iz stava 1. ovog člana do završetka redovnog školovanja, a izuzetno i za lica iz stava 1. ovog člana koja se ne nalaze na redovnom školovanju a koja su nakon 18. godine života prestala ispunjavati uslove za korištenje usluga smještaja a najduže do dvije godine od dana smještaja, a na prijedlog centra za socijalni rad“.

U istom članu, iza stava 2. dodaje se novi stav 3., koji glasi:

„Pod redovnim školovanjem podrazumijeva se školovanje u osnovnim, srednjim i višim školama, akademijama ili fakultetima, a najduže do 27. godine života“.

Dosadašnji stavovi 3. i 4. postaju stavovi 4. i 5.

U istom članu, iza stava 5. dodaje se novi stav 6., koji glasi:

„Troškove smještaja korisnika u domove i druge oblike smještaja za lica iz stava 1. ovog člana, na osnovu

zaključenog ugovora između Ministarstva, domova i drugih pružalaca usluga, snosi Ministarstvo“.

**Član 22.**

Iza člana 64. podnaslov „21. Nadzor nad stručnim radom ustanova socijalne zaštite“, mijenja se i glasi:

„21. Nadzor nad stručnim radom pravnih i fizičkih lica koji obavljaju djelatnost socijalne zaštite“.

**Član 23.**

U članu 65. riječi „ustanova socijalne zaštite“ zamjenjuju se riječima „pravnih i fizičkih lica iz članova 3. i 4. Federalnog zakona“.

**Član 24.**

U članu 67. stav 1. mijenja se i glasi:

„Nadzor vrši komisija koju imenuje ministar“.

U istom članu stavovi 2. i 3. brišu se.

**Član 25.**

Član 68. mijenja se i glasi:

„Pravna i fizička lica iz članova 3. i 4. Federalnog zakona dužna su omogućiti vršenje nadzora u skladu sa zakonom“.

**Član 26.**

U članu 69. riječi „ustanova socijalne zaštite“ zamjenjuju se riječima „pravnih i fizičkih lica iz članova 3. i 4. Federalnog zakona“.

**Član 27.**

U članu 71. riječi „ustanovu socijalne zaštite u kojoj“ zamjenjuju se riječima „pravna i fizička lica iz članova 3. i 4. Federalnog zakona kod kojih“.

**Član 28.**

Član 72. mijenja se i glasi:

„U roku od 15 dana po isteku roka iz člana 71. ovog zakona pravna i fizička lica iz članova 3. i 4. Federalnog zakona u kojima je nadzor izvršen dužni su da pismeno izvijeste Ministarstvo o izvršenju utvrđenih mjera.

Ukoliko lica iz stava 1. ovog člana ne podnesu izvještaj u roku iz stava 1. ovog člana ili ne izvrše utvrđene mjere, Ministarstvo podnosi zahtjev za pokretanje prekršajnog postupka protiv navedenih lica u skladu sa zakonom“.

**Član 29.**

U članu 74. u stavu 1., riječi „Ustanova socijalne zaštite obavezno organizuje i provodi“ zamjenjuju se riječima „Pravna i fizička lica iz članova 3. i 4. Federalnog zakona obavezno organizuju i provode“.

U istom članu u stavu 2., riječi „ustanove socijalne zaštite“ zamjenjuju se riječima „pravnih i fizičkih lica iz članova 3. i 4. Federalnog zakona“.

**Član 30.**

U članu 84. u stavu 2. tački 2., riječi „ako su nesposobni za samostalan život i rad, a nesposobnost je nastupila“ zamjenjuju se riječima „ako su sa smetnjama u fizičkom ili psihičkom razvoju a smetnje su nastupile“, a riječi „za cijelo vrijeme trajanja nesposobnosti“ zamjenjuju se riječima „a najduže do navršene 27. godine života“.

**Član 31.**

U članu 90. u stavu 1., riječi „porođaja“ zamjenjuju se riječima „stupanja na porodiljsko odsustvo“.

U istom članu, u stavu 4. iza riječi: „odnosu“ dodaje se zarez i riječi „a u skladu sa rješenjem centra za socijalni rad u sklopu redovnih isplata plaća“.



U istom članu, iza stava 4. dodaju se novi stavovi 5. i 6., koji glase:

„Lica iz člana 89. ovog zakona obavezna su podnijeti zahtjev za utvrđivanje prava na naknadu plaće i visinu te naknade mjesno nadležnom centru za socijalni rad u roku od šest mjeseci od dana stupanja na porodijsko odsustvo, a najkasnije do isteka porodijskog odsustva.

Ukoliko lica iz stava 5. ovog člana ne podnesu zahtjev u roku iz stava 5. ovog člana gube pravo na naknadu plaće“.

Dosadašnji stav 5. postaje stav 7. i isti se mijenja i glasi:

„Pravilnik o načinu, postupku i rokovima za ostvarivanje prava iz člana 89. ovog zakona i načinu obračuna, isplate i povrata naknade plaće iz stava 1. ovog člana donosi ministar“.

#### Član 32.

U članu 91. u stavu 2., riječi „ili zasebno“ brišu se.

U istom članu, iza stava 3. dodaje se novi stav 4., koji glasi:

„Povrat isplaćenih sredstava na ime naknade umjesto plaće ženi – majci, odnosno ocu djeteta ili usvojitelju ili staratelju u radnom odnosu za vrijeme dok odsustvuje s posla radi trudnoće, porođaja, odnosno njege djeteta, uključujući doprinose iz člana 91. stav 1. ovog zakona izuzev doprinosa na plaću na teret poslodavca u visini propisanoj odredbama Zakona o doprinosima, vrši Ministarstvo u skladu sa rješenjem o priznavanju prava na naknadu plaće nadležnog centra za socijalni rad i zahtjeva poslodavca za povrat isplaćene naknade plaće uz potrebnu finansijsku dokumentaciju“.

#### Član 33.

Iza člana 108. dodaje se novi član 108a., koji glasi:

„Član 108a.

Centri za socijalni rad će donijeti rješenje o prestanku prava priznatih na osnovu odredaba ovog zakona kada na osnovu službene provjere ili podataka dostavljenih od korisnika prava utvrdi da je korisnik prestao ispunjavati uslove za ostvarivanje prava.

Korisniku prava po ovom zakonu prestaju ta prava napuštanjem Bosne i Hercegovine duže od tri mjeseca, računajući od dana napuštanja Bosne i Hercegovine.

Povratkom u Bosnu i Hercegovinu korisnik prava po ovom zakonu, može podnijeti zahtjev za ponovno uspostavljanje tog prava“.

#### Član 34.

Član 113. mijenja se i glasi:

„Centar za socijalni rad će povremeno, a najmanje jednom godišnje, preispitati postojanje činjenica i okolnosti koje su bile odlučujuće za utvrđivanje prava priznatih na osnovu odredaba ovog i Federalnog zakona i donijeti novo rješenje samo ako su se promijenile okolnosti o kojima zavisi ostvarivanje ili obim priznatog prava“.

#### Član 35.

Član 114. mijenja se i glasi:

„Ministarstvo će, na osnovu ukazane potrebe, vršiti reviziju rješenja o priznatim pravima iz ovog zakona.

U vršenju revizije Ministarstvo stavlja na prvostepeno rješenje zabilješku da je revizija izvršena i da je rješenje u skladu sa zakonom ili ukida, odnosno poništava i vraća prvostepeno rješenje na ponovno odlučivanje, ako rješenje nije u skladu sa zakonom.

Postupak revizije ne odlaže izvršenje rješenja“.

#### Član 36.

U članu 115. stav 1. mijenja se i glasi:

„Obračun novčanih pomoći i naknada po ovom zakonu vrši nadležni centar za socijalni rad, a isplatu Ministarstvo na teret Budžeta Kantona“.

U istom članu stavovi 2., 3. i 4. brišu se.

Dosadašnji stav 5. postaje stav 2.

#### Član 37.

U članu 116., iza stava 2. dodaje se novi stav 3., koji glasi:

„Ukoliko su korisniku priznata ili isplaćena primanja na koja nije imao pravo po ovom zakonu ili mu ne pripadaju u tom obimu zbog nezakonito provedenog postupka od strane centra za socijalni rad, a za koja korisnik nije znao ili nije bio dužan znati, povrat tog iznosa u Budžet Kantona obavezan je izvršiti centar za socijalni rad koji je priznao navedena prava“.

#### Član 38.

U članu 120. riječ „ustanova“ zamjenjuje se riječima „pravni i fizičkih lica iz članova 3. i 4. Federalnog zakona“.

#### Član 39.

U članu 121. u stavu 2., riječi „ustanova socijalne zaštite“ zamjenjuju se riječima „pravni i fizičkih lica iz članova 3. i 4. Federalnog zakona“.

U istom članu, u stavu 3. iza riječi „mjera“ dodaju se riječi „u skladu sa Zakonom o inspekcijama Tuzlanskog kantona“.

#### Član 40.

Član 122. mijenja se i glasi:

„Novčanom kaznom od 500,00 do 1.000,00 KM kaznit će se za prekršaj pravno lice, ako:

- korisniku, protivno odredbama ovog zakona, uskrati ili smanji iznos isplata koje mu pripadaju,
- omogućiti isplatu licu koje na istu nema pravo po ovom zakonu ili mu ne pripada isplata u tom iznosu,
- ne vodi propisanu evidenciju o korisnicima i pruženim uslugama (član 45. stav 1.),
- ne omogućiti vršenje nadzora (član 68.),
- u roku od 15 dana ne podnese izvještaj o izvršenju utvrđenih mjera (član 72.),
- u roku od 15 dana ne uplati naplaćeni novčani iznos za vrijeme „Dječije nedjelje“ (član 104. stav 1.).

Za prekršaj iz stava 1. ovog člana kaznit će se fizičko lice novčanom kaznom od 100,00 do 400,00 KM.

Za prekršaj iz stava 1. ovog člana kaznit će se odgovorno lice u pravnom licu novčanom kaznom od 100,00 do 400,00 KM.

Novčanom kaznom od 100,00 do 400,00 KM kaznit će se za prekršaj odgovorno lice u Ministarstvu ako uplaćena novčana sredstva u Budžetu Kantona, sa pozicije „Dječija nedjelja“, ne raspoređuje u skladu sa članom 105. ovog zakona.

Novčanom kaznom od 100,00 do 400,00 KM kaznit će se za prekršaj korisnik prava ako ne prijavi promjenu koja je od uticaja na ostvarivanje i obim tog prava, u roku od 30 dana od dana nastale promjene (član 110.).“

#### Član 41.

Ministar će, u roku od 90 dana od dana stupanja na snagu ovog zakona, donijeti pravilnik kojim se utvrđuju uslovi u pogledu prostora, opreme i kadra za obavljanje djelatnosti socijalne zaštite, zaštite civilnih žrtava rata i zaštite porodice sa djecom (član 41. stav 3. Zakona).

**Član 42.**

Pravna i fizička lica iz članova 3. i 4. Federalnog zakona dužna su u roku od šest mjeseci od dana stupanja na snagu ovog zakona uskladiti organizaciju, djelatnost, norme stručnog kadra i opće akte sa odredbama ovog zakona i propisa donesenih na osnovu ovog zakona.

Lica iz stava 1. ovog člana dužna su u roku od 30 dana po proteku roka iz stava 1. ovog člana podnijeti zahtjev Ministarstvu za utvrđivanje ispunjavanja općih i posebnih uslova za početak, odnosno nastavak rada i obavljanja djelatnosti.

**Član 43.**

Centri za socijalni rad će, u roku od šest mjeseci od dana stupanja na snagu ovog zakona, izvršiti usklađivanje rješenja o priznatim pravima sa odredbama ovog zakona.

**Član 44.**

Ovaj zakon stupa na snagu osmog dana od dana objavljivanja u „Službenim novinama Tuzlanskog kantona“.

Bosna i Hercegovina  
- Federacija Bosne i Hercegovine -  
TUZLANSKI KANTON  
Skupština  
Broj: 01-02-323-12/15  
Tuzla, 29.9.2015. godine

PREDSJEDNIK  
Skupštine Tuzlanskog  
kantona,  
Senad Alić, v.r.

**595**

Na osnovu člana 24. stav 1. tačka c) Ustava Tuzlanskog kantona („Službene novine Tuzlansko-podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04) i člana 63. stav 3. Zakona o zdravstvenoj zaštiti („Službene novine Federacije Bosne i Hercegovine“, br. 46/10 i 75/13), Skupština Tuzlanskog kantona, na sjednici održanoj 29.9.2015. godine, d o n o s i

**O D L U K U****o davanju saglasnosti****Član 1.**

Daje se saglasnost na Statut Javne zdravstvene ustanove Opća bolnica „Dr. Mustafa Beganović“ Gračanica, broj: 03-04-03/15 od 21.9.2015. godine.

**Član 2.**

Odluka stupa na snagu danom donošenja i bit će objavljena u „Službenim novinama Tuzlanskog kantona“.

Bosna i Hercegovina  
- Federacija Bosne i Hercegovine -  
TUZLANSKI KANTON  
Skupština  
Broj: 01-02-642-4/15  
Tuzla, 29.9.2015. godine

PREDSJEDNIK  
Skupštine Tuzlanskog  
kantona,  
Senad Alić, v.r.



**"Službene novine Tuzlanskog kantona"**  
**broj: 11/2015****SADRŽAJ****SKUPŠTINA**

591. Zakon o turističkim zajednicama	1277
592. Zakon o plaćama i naknadama izabranih dužnosnika, nosilaca izvršnih funkcija i savjetnika u organima zakonodavne i izvršne vlasti Tuzlanskog kantona	1286
593. Zakon o izmjenama i dopunama Zakona o javnom okupljanju	1290
594. Zakon o izmjenama i dopunama Zakona o socijalnoj zaštiti, zaštiti civilnih žrtava rata i zaštiti porodice sa djecom	1290
595. Odluka o davanju saglasnosti, broj: 01-02-642-4/15 od 29.09.2015. godine (na Statut JZU Opća bolnica „Dr. Mustafa Beganović“ Gračanica)	1294

